

'Dódoógu Ledre gi ro búku bi 'Dódoógu ní

Yiwáni 'yìmikása eké ledre ba ne simi kanísa ga bi ìnyì doa gbre bi ndìšìne lúru bi kacíye ní. Simi kápita 2-3, eké ledre e mingúngúcuwa simi kanísa ga gére ní lóru yée idíní óyóló'bó mimbé'deyé zíye ídíye tí fú mbigí 'yì ga bi 'bì Lomo ní abú ngíti géyì 'yì e ñiyí kí ndìšì 'dó'do yée ndotó. Ngíti géyì ledre ga bi eké yée ní ñiyí ledre ga bi Lomo 'dodo yée zía ní. Lurú roko'bu 'bì Lomo kí zingi ené bi ro 'yì luyú ledre e do sogo káṅgá nda kí roko'bu 'bì Kírésìto simi bi karanée ni 'dècì ngbanga 'yì luyú ledre e gi zía bi kalaní ledre ené 'bì Kírésìto ní cù kí komoné. Zí Lomo nda óto mìkànda do sogo káṅgá zíye ndìšiyé simi a kí 'yì ga bi ṅuṅguní ledre ené ní zía fí odù a ndaá.

Ledre ga bi 'dodoní yée zí Yiwáni ní

¹ Ba ledre ga bi Lomo i'bì yée zí Kírésìto Yésu gi ro zía 'dódo yée zí 'yì kasa ené kídí ñiyí méngì royé 'diya ní. Kasa maláyika ndéré 'dódo yée zí 'yì kasa ené Yiwáni. ² Eké ga ba tí za mbá ledre ga bi lúru yée za cù kí komoné ñiyí za mbá ma'díi ledre e 'bì Lomo bi Kírésìto Yésu 'dodo yée zía ní. ³ Úndru ni ídí zí 'yì bi ni ólo miúkutátá ledre ba, úndru ni kpá ídí zí yée ga bi ñiyí úwú ledre

bì ekéní ba zíye 'dí'bióto a do mimbé'deyé ní, gí zía sìnḍí kadra nì go gbóo.

Mandá zí kanḥsa ga bì ngunḡuní ledre Kírésito ní

⁴ Maa Yiwáni, máéké ledre ba zíse, sée 'yì ga bì 'bì Kírésito, ásé simì Kanḥsa ga bì ìnyì doa gbre simì kánḡá bì Ásiya ní.

Lomo bì nì yì ené kóo kú bo 'desì, nì karaba kpá fú bo, nì idí ené kpá fú bo ní. Idí ówo ledre kíse gí do bì zíse ndìsìsè bilámáse. 'Dówù Lomo* idí kpá idí kíse gí zía kací kadra mbá nì fú lá ndìsì tóro kó'dù kḥtì ngére 'bì Lomo. ⁵ Kírésito Yésu bì 'yì ótoyéme ledre e, bì nì ne mizefì 'yì bì urú gí simì umbu ní, nì kpá ne Ngére do ngére e do sogo kánḡá za mbá. Idí kpá idí kíse.

Oto 'búze go kíngaya zía í'bì roné zí umbu úyuné gí rozé. ⁶ Oto zée go zíse idíze káa zí ngére e kpá káa zí 'yì 'dáná éyì e ní ndìsì méngì moko zí 'Buné Lomo. 'Yì e za mbá idíní ndìsì í'bì mbófo éyì zía za fí. Idí kenée.

⁷ Lúrúsé aka, Yésu nì go ndá'baógù simì buḡunḡù,

'Yì e za mbá niyí lúru wo,

abú kpá 'yì ga bì kóo ufuní wo ní,

'yì e do sogo kánḡá mbá niyí útú ndìsì ìni ìni gí zí ngìrì miógù a née.

Ledre ma'dáa nì idí kenée.

⁸ Zí Ngére Lomo úku ledre kídí, "Mááyí dosì éyì e kpá odu éyì e." Nda kpá lá dujú née wá,

* **1:4** 1:4 'Dówù Lomo ga ìnyì doa gbre ní: Ba ngíti misi'di 'bì ódro gí ro 'Dówù Lomo.

“Mááyí kpá wo ni bo, ni kóo kú bo, kpá wo bi ni ógu ní. Mááyí Lomo bi roko'bua ofu go ní.”

Kírésito 'dodo roné zí Yiwáni

⁹ Maa Yiwáni, lúndusé, ndìsìzè 'dó'dó ndro kése gi zía bi Yésu ni Ngére ezé, i'bí roko'bu 'bi útusimi ne zize gi ro zize ndìsìzè útusimizé. Onzóní máa simi sígìni simi cúkú bi Pátomosa ní gi zía mándìsì úku bilámá ledre 'bi Lomo kpá kí ma'díi ledre gi ro Yésu zí 'yì e. ¹⁰ Simi ngíti sɛndí kadra 'bi ini zí Ngére Lomo, simi roko'bu 'bi 'Dówú Lomo, zíma úwú kúrú 'yì kí ódro zíma 'dága gi 'dí sogomá káa zí dībīlī owúne ní. ¹¹ Zía úku ledre kídí, “Ídí éké ledre ga bi áyí lúru yée ba zíyì kása yée simi kanísa ga bi ìnyì doa gbre (7), Éfeso, Samuróna, Peragamóna, Tayatíra, Saradísì, Filadelifíya nda kí Lawudikíya ní.”

¹² Zíma óyó komomá lúru 'yì bi ndìsì ódro ba. Mááyí lúru bi káa ní, zíma lúru ndíki éyì bi ndìsìní óto lámba doa ní, ìnyì doa gbre yemení yée gi simi dábu. ¹³ Zíma lúru ndíki 'yì káa zí “Owú 'bi 'yíma'dí ní,” mitoroné dongará éyì ga bi ndìsìní óto lámba doa ìnyì doa gbre née. Esì roné mongú ngbángbá bongó bi akpaogu gi do sogo sɛndía ní. Zía 'dí'bi bongó bi káa zí yemení gi simi dábu ní ónzó ngílífi a do kó'dúne. ¹⁴ Bi doa ni 'duo bikenyíne káa zí bikenyì burungú ní, togú wá, 'dófi ní, zí kuru'bu komoa ndìsì ndícíne káa zí mbílí pho'du ní. ¹⁵ Zí sɛndíga ésíye káa zí késì gi zí pho'du 'boro ní, zí simi kúrúa ndìsì ngúndruné kí ódro káa zí mongú vuru ní.

16 'Di'bi kele e go ìnyì doa gbre do s̀l̀l̀ne 'bi anú, źi mongú bukafu maku nd̀s̀s̀ olúóguné g̀i kua. Źi simi komoa nd̀s̀s̀ r̀r̀r̀ne káa źi b̀i kadra b̀i ǹi kp̀t̀tere simi do ní.

17 Simi bi málúró wo ní, źima nd̀úrú má bi kó'dú a kenée káa źi éỳi b̀i máúyu go miúyu ní. Źia óto s̀l̀l̀ne 'bi anú romá, źia úku ledre kídí, “Ndá éré ng̀r̀i wá. Mááyí dos̀i éỳi e kpá odù éỳi e.” 18 Mááyí nda go tr̀dr̀má za fí. Ufuní kóo máa, źima úrúma. B̀i ba ní, mááyí nda ỳi amá go tr̀dr̀má za fí. Roko'b̀umá romo 'bi umbu go, mááyí go ng̀ere do umbu za fí.

19 Ledre ga b̀i áỳi nd̀s̀s̀ lúró yée née, yée ga b̀i niỳi méng̀i royé cakaba, kí yée ga b̀i niỳi méng̀i royé karanée ní, ídí éké yée za mbá miéké ndaá ótoómo bikér̀i a wá. 20 Mááyí ba 'dódo ini ledre g̀i simi kele ga b̀i ìnỳi doa gbre (7) do s̀l̀l̀ma 'bi anú ba, kpá kí éỳi ga b̀i ìnỳi doa gbre (7) nd̀s̀s̀ǹi óto lámbe doyé yemení yée g̀i simi dábu ní źiỳi. Kele ga gére, niỳi manda e simi kaǹsa ga b̀i ìnỳi doa gbre (7) ní. Éỳi ga b̀i ìnỳi doa gbre (7) nd̀s̀s̀ǹi óto lámbe doyé yemení yée g̀i simi dábu née niỳi 'b̀i eyé kaǹsa ga b̀i ìnỳi doa gbre (7) ní.

2

Sanda źi manda 'b̀i kaǹsa b̀i simi Éfeso ní

1 Źia úku ledre źima kídí, “Ídí éké ledre ga ba źi manda 'b̀i kaǹsa b̀i simi Éfeso ní kídí,

“Ba kúrú 'ỳi b̀i ǹi kí kele e do s̀l̀l̀ne 'bi anú ìnỳi doa gbre, źia nd̀s̀s̀ gámáne dongará éỳi ga b̀i ìnỳi doa gbre nd̀s̀s̀ǹi óto lámbe doyé

yemení yée gí simi dábu ní. ² Máówo miméngi ledre eyí e go, moko ga bi méngi yée kíngaya, zíyí ídíyí kí mongú útusimi ní. Íli eyí kpá zise ndísi kótru rosé kí 'yí méngi bisinyí ledre e wá. Simi bi úzu 'yí ga bi ndísiní úku ledre kídí yée niyí 'yimikása amá e ní, zíyí ówo a kídí, í'í, ranganí yí eyé ranga ndaní eyé 'yimikása amá e wá. ³ Máówo bú bilámáne kídí í'bí royí go ndísi 'dó'dó gí romá. Simi 'do'dó ga bi ndísi 'dó'dó yée née mbá, zíyí ndísiyí útusimiyí kíngaya óyó sogoyí zíma wá.

⁴ “Tí lá ngíti ledre ni bo mándá kí rokinyi gí zíyí gí roa wá, óto lolu 'búma doyi káa zí wo bi kóo 'dá'dá ní wá. ⁵ Ídí ówo lúyú ledre eyí, zíyí óyóló'bó sómú ledre eyí zíyí ndá'baoguyí méngi ledre ga bi kóo ndísi méngi yée 'dá'dá ní. Togú óyóló'bó sómú ledre eyí wá, mááyí ógú 'dí'bióyó éyí ga bi ndísiní óto lámba doyé née gí zíyí 'dá'ba. ⁶ Ngíti éyí ni bo méngi wo mááyí kí rokinyi gí zíyí gí roa. Née ledre bi sógó bisinyí miméngi ledre ga bi 'bi 'yí 'bi Nikóla e ní. Maa, másógó bisinyí miméngi ledre eyé née kpá misógó.

⁷ “Togú mbílíyí ni tí bo yá, ídí úwú ledre bi 'Dówú Lomo uku zí kanísa ní. 'Yí bi ni tóro ngbúó zía rómo komo Satána ní, mááyí í'bí mási'di zía ólúne sí kágá 'bi tridri bi simi yáká 'bi Lomo ní.”

Sanda zí manda 'bi kanísa bi simi Samuróna ní

8 “Ídí éké ledre ba zí manda 'bì kanṣa bì simi Samuróna ní kídí,

“Ba sanda gí zí wo bì ni mizefi 'yì, bì ni kpá odu 'yì ní, wo bì kóo uyu zía kpá úrúne ní.

9 Máówo 'do'dó kí lerì eyì go. Abú kenée ndá 'bì eyì 'yì lerì e wá. Máówo kpá bisinyí ledre 'bì 'yì ga bì ya yée niyí Yúda e ní go, ndaná eyé Yúda e wá. Niyí yì eyé 'yì ga bì 'bì Satána ní.

10 Ndá éré ngìrì gí zí 'do'dó bì ni go ógu royí ní wá. Máúku zýyì ngére 'bì bicayi lomo e ni ónzó ngíti géyì lafúyì e simi sígìni gí ro úzu yì. Áyí ógu 'dó'dó kí sílì sokó (10). Abú ayíní úfu yì za cú miúfu, ídí tóro ngbúó. Odu a mááyí í'bí trìdrì zýyì káa do tákpásílì.

11 “Togú mbílíyì uwú ledre bú, ídí úwú ledre bì 'Dówú Lomo ni ndìsì úku a zí kanṣa ní. 'Yì máa wo bì ni tóro ngbúó simi 'do'dó ní, utúasá 'dó'dó gí zí miówo gbre umbu* lolu wá.”

Sanda zí manda 'bì kanṣa bì simi Peragamóna ní

12 “Ídí éké ledre ba zí manda 'bì kanṣa bì simi Peragamóna ní kídí,

“Ledre ba ni gí zí wo ni kí mongú bikafu maku zíne ní. 13 Máówo bi ndìsiyì bú, ndìsì dongará 'yì ga bì kí'dí bì Satána oto kítì ngére ené ní. Abú kenée ndotó, óyósé esé sogosé zíma wá, abú gba simi bì kóo 'di'biní ezesé Andipá bì ni ngúru 'yì amá zýye úfu wo za cú do komosé kí'dí bì Satána ni ore ní.

* 2:11 2:11 Gbre umbu: Ídí ólo ledre gí ro gbre umbu simi 'Dódoógu 20:6,14, 21:8.

14 “Simi ledre ga gére née mbá, ngíti owú lúyú ledre ni bo rosé. Ngíti géyì 'yì e niyì dongarásé íri lanyání go fú ro 'dódo ledre bi kóo Baláma 'dodo zí Baláka† ní kídí, togú Isiréle e anuní éyì bi 'danání lomo ga bi yemení kí sîlî 'yì ní, kpá kí ndîsî méngî 'berî yá, née ndaá 'bi ené lúyú ledre wá. 15 Kpá séré kenée, ngíti géyì 'yì e gi dongarásé ndîsiní go méngî ledre ga bi 'yì 'bi Nikóla ndîsiní 'dódo yée ní. 16 Bilámá a, ídísé mu óyóló'bó mimbé'desé. Togú ílisé úwú ledre née wá, mááyí ógụ méngî okó kíye kí mongú bikafa maku bi ni ndîsî ólúógu gi komá ní.

17 “Togú mbílise ni tí bo yá, ídísé úwú ledre bi 'Dówú Lomo uku zí kanîsa ní kídí, 'yì bi ni tóro ngbúó oyó sogoné zîma wá ní, mááyí í'bi miótoécî mána zîa. Mááyí kpá ífî mikánda ìrî bi miékéne ro misisilekpe bikenyî owú tutú ní doa. Ngíti 'yì kpî utúasá ówo ìrî née wá òwú 'yì bi máífî ìrî née doa ní.”

Sanda zí manda 'bi kanîsa bi simi Tayatíra ní

18 “Ídí éké ledre ba zí manda 'bi kanîsa bi simi Tayatíra ní kídí,

“Ledre ba ni gi zí Owú 'bi Lomo, bi kuru'bu komoa ndîsî ndící káa zí mbílí pho'du, zí nzísindíga ésiye káa zí so pho'du ní. 19 Máówo miméngî ledre eyì e, 'bú 'yì e bi ndîsî óto a, kí ledremá bi ngúnḡu, bilámá moko ga bi ndîsî méngî yée, nda kí simikutu bi áyí kîe ní bú.

† 2:14 2:14 Baláma e kí Baláka: Ólo ledre gi ro Baláma e kí Baláka simi Ólo 'yì e 22-24.

Máowoyéme kpá go kídí cakaba ní, ndịsị go méngị moko rómo yée ga bi kóo 'dá'dá ní mbá.

²⁰ “Abú kenée ndotó, ledre ni kpá fú bo simimá royí. Nì ledre bi ótoómo bisinyí kára née Izibéle,‡ bi oto roné káa do Nébi íri ní. Kí bisinyí 'dó'do ledre ené, londo tú'dú 'yì 'bi moko amá e go zíye ndịsiyé só'do royé kí 'yì ga bi ofuní royé kéye wá kpá kí ánu éyì ga bi 'danání zí lomo ga bi yemení yée kí sịlì 'yì ní.

²¹ Mái'bí tí sịndị kadra go zía gị ro zía óyóló'bó sómụ ledre ené gị simi bisinyí miméngị ledre ga gére ní, tí lá ili ené e wá. ²² Mááyí ódóngéřì wo kí bisinyí ndíyá zía ídine m' dú'duné do řangba bi gamá wá. Zíma kpá í'bí 'do'dó ro ya'dá ga bi so'doní royé kéne ní, 'búó togú oyólo'bóní sómụ ledre eyé go. ²³ Mááyí kpá úfu 'yì ga bi ңuңguní ledre ené ní 'dá'ba. Gị ro zí 'yì ga bi ңuңguní ledre amá go ní ówo a kídí ma'díi máowo sómụ ledre 'bi 'yì kí ledre ga bi do mimbé'dea ní mbá bú. Gị zí keyi née mááyí í'bí tákpásìlì zí 'yì kací miméngị ledre ené.

²⁴ “Sée ngíti géyì 'yì ga bi 'bi Tayatíra, ásisé gị ro bisinyí 'dódo ledre 'bi kára née ní ní, ówosé esé éyì bi 'yì 'bi Satána ndịsini ndólo a miótoéçì ledre 'bi Satána ní wá. Gị zí keyi née ní, máoto ngíti lorụ dosé owóowó lolu wá. ²⁵ Ídísé lánýá ro ledre bi 'dodoní zise ní gị simi sịndị kadra 'bi

‡ **2:20** 2:20 Izibéle: Nì ne kára bi ndịsị lóndo Isiréle e zíye ndịsiyé íni ini zí lomo ga bi yemení yée kí sịlì 'yì ní. Ólo ledre gị roa simi 1 Míngburoko ngére e 16:29-31, 18:4, 19, 2 Míngburoko ngére e 9:22.

míndá'baógumá.

²⁶ "'Yì bì nì tóro kíma simì ledre kací kadra mbá gị simì odu sịndí kadra ní, mááyí í'bí roko'bu zía. Zía ídíne ngére do sị do 'yìma'dí e mbá.

²⁷ "'Nì ídí Ngére do ríkí sị do 'yì e kí mongú roko'buné káa zí késí ní.

Zía ndịsine kánya yée káa zí pheré ndoko ne ní.'

Ledre née nì ídí kenée gị zía bì Babá í'bí roko'bu go zíma ní. ²⁸ Mááyí kpá í'bí bimióngó zíye káa zí kérékobi bì ndịsị olúógú ne kí simì bì ní. ²⁹ Togú ásé tí 'yì úwú ledre e, ídíse úwú ledre bì 'Dówú Lomo ndịsị úku a zise ní."

3

Sanda zí manda 'bì kanisa bì simì Saradịsị ní

¹ "Ídí éké ledre ga ba zí manda 'bì kanisa bì simì Saradịsị ní kídí,

"Ba sanda gị zí wo bì nì kí 'Dówú 'bì Lomo zine ìnyì doa gbre (7) kpá kí kele e ìnyì doa gbre (7) ní. Máówo miméngị ledre eyị e go bú. 'Yì e mbá niyí sómú ledre kídí áyí trịdri, ábuwá úyu yì eyị go. ² Káa zí bì goó kenée ní, úrú mu zíyì ó'bu ngítíyì née gị zía idiaká go lá cúku'dée zíyì úyu ókpó royí za fí. Máówo go kídí éyì bì ndịsị méngị a ní ndaá 'bì ené bilámáne do komo Lomo wá. ³ Ídí sómúndiki ledre kóo 'dodoní zíyì bì kóo úwú ní. Ídí lánýá roa zíyì óyóló'bó sómú ledre eyị gị simì lúyú ledre. Togú méngị ledre née kenée wá,

mindá'baógumá mááyí lỳyì yìi mìlỳyì káa zí bì 'yì ugu ndịsì lỳyì 'yì e ní.

⁴ “Abú kenée ndotó, sée ngíti géyì 'yì e simi Saradịsì íri bongó esé ndaá 'bì ené kí ìndrị roné wá. Gị zí kényì née azé ndịsì gámá kése kí bikenyì bongó rozé gị zía útúásásé go miútúásá. ⁵ 'Yì máa wo bì toro go ngbúó ní, ni kpá ésì bikenyì bongó roné. Málùlụoyó ìrịa gị simi búkụ 'bì trịdrị wá. Mááyí úku ledre zí Babá kí maláyika ené e máyá née 'yì amá. ⁶ Togú úwúsé tí ledre bú, ídísé úwú ledre bì 'Dówú Lomo ndịsì úku a zise ní.”

Sanda zí manda 'bì kanịsa bì simi Filadelifiya ní

⁷ “Ídí éké ledre ga ba zí manda 'bì kanịsa bì simi Filadelifiya ní kídí,

“Ba kúrúma bì mándá 'yì lúyú ledre wá, kpá 'yì méngì cóngó ledre do komo Lomo kpá go Ngére do bi kací Dawídi ní. Simi bì málíkpi mbotụ ledre go ní, 'yì 'dútụ a ndaá. Simi bì má'dútụ mbotụ ledre go ní, 'yì líkpí a ndaá. ⁸ Máówo miméngì ledre esé e za mbá bú. Lúrúsé aka málíkpi mbotụ ere go zise 'yì bì ni 'dútụ a gị zise ní ndaá. Máówo kpá bú abú owú roko'bụsé ni cúku'dée yá, óyósé esé sogosé zíma wá. Ásé kpá fú mitórosé ngbúó sogomá do bilámá 'dódo ledre bì kóo 'dodoní zise gị romá ní. ⁹ 'Yì 'bì Satána ga gére ní ndịsini úku ledre kídí yée niyí Yúda e, yì ené րanga ndaní eyé Yúda e wá. Mááyí óto yée zíye ídíye káa do mbigí simi sịndise gị ro

zíye ówo a kídí, 'búse ofu domá go. ¹⁰ Mbófo éyí zise, gí zía ngúngusé ledremá zise go útụ simisé kíngaya. Mááyí kpá lúrú bi kacise kadra úzu éyí bi ni ógụ do sogo kángá úzu 'yì ga bi ngunḡuní ledremá wá ní.

¹¹ “Ídísé ówo a bilámáne kídí mááyí go 'duo gbóo gí ro ndá'baógu. Ídísé tóro fú lá ngbúo sogomá káa bi niyí 'dí'bióyó tákpásílí bi ni tridri bi za fí ní gí zise. ¹² 'Yì máa wo bi ni rómo komo Satána ní, mááyí óto wo kí ledrené owóowó simi 'Dìcì 'bi Lomo. Utúasání 'di'bioyó wo gí do bi máa née wá. Mááyí ékéóto ìrì Lomo amá kí ìrì mongú gara bi mikánda Yerusaléma bi ni ógụ gí komo ere gí zí Lomo ní simi komoa. Mááyí ékéóto mikánda ìrì amá simi komoa. ¹³ Togú úwúsé tí ledre bú, ídísé úwú ledre bi 'Dówú Lomo ni ndìṣì úku a zise ní.”

Sanda zí manda 'bi kanṣa bi simi Lawudikíya ní

¹⁴ “Ídí éké ledre ba zí manda bi simi kanṣa 'bi Lawudikíya ní kídí,

“Ba kúrú 'yì bi togú uku ledre go yá, zí ledre née ídine tí kenée ní. Ni 'Yì bi ndìṣì méngì duḡ ledre bi Lomo ili ní, kpá Ngére do éyí e za mbá ní. ¹⁵ Máówo miméngì ledre eyí e bú. Ndá 'bi eyí bikìdrì 'yì togú miṣrì 'yì wá. Máílì kóo zíyì ídíyì ngúrúyè. ¹⁶ Gí zía bi ndá 'bi eyí lolu bikìdrìyì, ndá kpá miṣrìyì wá ní mááyí sí'diógu yì gí komá 'dá'ba. ¹⁷ Ndìṣì úku ledre yá éyí ofuní zíyì go, ìli lolu ngíti éyí e wá. Ówo bi

kídí kébíbí éyí ndaá zíyí wá, áyí mongú 'yì lerí, komoyí ndaá, ndìsì gámá kpá ngírà ní wá gí zì 'dì? ¹⁸ Ídì 'dí'bi somú ledre gí zíma, nì óto yì zíyí ídíyì mbigí 'yì 'bì Lomo, kébíbí lúyú ledre ndaá royí wá. Éyí ga bì kóo ndìsìní 'dí'biógu dokuwu zíyì, kí yée ga bì ndìsìní 'dùtù komoyí ní, Lomo nì 'dí'bióyó yée mbá 'dá'ba gí zía áyí go mbigí 'yì ené.

¹⁹ "'Yì ga bì máìli ófù yée go ní, mándìsì lóru yée zíma ndìsì 'dó'do yée mì'dó'do káa bì niyí lúyú ledre. Mé ba, ídísé óyóló'bó sómú ledre esé zíse ótoómo kí lúyú ledre. ²⁰ Mááyí goó mitóromá tara mbotù ndìsì kóko mbotù ba, 'yì bì uwú domá go zía líkpí mbotù zíma ní, mááyí olú zía 'dìcì írì zíze ánu éyì kéne.

²¹ "'Yì bì nì tóro ngbúó zía rómo komo ezeokóne e ní, azé ndìsì kéne do kítì ngére amá, cé káa zì bì márómo komo ezeokóma zíze go ndìsì ndìsìzé kí Babá do kítì ngére ené ní.

²² Togú úwúsé tí ledre bú, ídísé úwú ledre bì 'Dówú Lomo nì ndìsì úku a zì 'yì ené e ní."

4

'Yì e otoní úndru Lomo komo ere

¹ Gí do kací a née zíma lúrúndíki bifúó komo ere káa zì mbotù ní líkpíní go fúó. Zì kúrú 'yì gáa máúwú 'dá'dá ní ówúne zíma gírì káa zì dībìlì ní kídí, "Ógu gírì yáa zíma 'dódo ngítì éyì bì nì méngì roné ní zíyì." ² 'Diya káa ní, zì roko'bù 'Dówú Lomo sólù máa yeré, zíma lúrúndíki kítì ngére komo ere ngítì 'yì nì m̀ndìsìné doa. ³ 'Yì

bi ndịsi do kiti iri nee, simi komoa ndisi riri kaa owu tutu bi ndisi riri miriri ni. Zi bi ongone cigi kiti ngere nee gbaa do ndisi ndicine kaa zi bi ongo gi zi mikoru ni. ⁴ Zi ngiti geyi kiti ngere e cikeri doa eso (24) idie cigi wo maa nee gbaa. Mngburoko 'yi e niyi do kiti maa ga gere nee kpa cikeri doa eso (24). Niyi mba ki bikenyi bongoro roy kpa mba ki tagiya ga bi miririye gi simi dabu ni ro doye. ⁵ Gi 'di zi kiti ngere nee giri 'duo mongu bimiongo wee. Zi kuru 'yi ndisi owune giri kaa zi nzagba ndisi embé nee ni. Zi lamba e inyi doa gbre idie mindiye kodu kiti ngere nee iri. Ga gere nee 'Dowu Lomo. ⁶ Zima kpa lurundiki mongu nyara bi wee kodu kiti nee iri.

Zi eyi tridri e eso (4) idie gbaa cigi kiti ngere maa nee, zi komo idine roy mba. ⁷ Mizefi eyi tridri maa ga gere nee toso a ni kaa zi kemi ni. Gbre, toso a 'bi ene kaa zi ya'da iti ni. Ota (3), toso a 'bi ene kaa zi 'yima'di ni. Eso (4), toso a nda 'bi ene kaa zi gu'du ni. ⁸ Eyi tridri ga bi eso (4) nee, niyi mba ki funduye inyi doa keri (6), inyi doa keri (6) kacie eso (4) ce. Zie idie ki tudu komoye roy gbaa kpa gba si funduye mba. Zie ndisiye kofu iri Lomo ki ndulu ki kadra mba kadi,

“Mbigi Lomo, Mbigi Lomo, Mbigi Lomo, ni
Ngere.

Ni Lomo bi ki mongu roko'bune kingaya ni,
ni koo ku bo, ni cakaba kpa bo, ni ne wo bi ni
ogu ni.”

⁹ Simi bi eyi tridri ga gere nee niyi ndisi kofu

irì mbigí Lomo, kí ndìsì óto úndru a zíye ndìsìyé kí mbófo wo bi ni ídí trìdrìné za fí ní, ¹⁰ geré zí m̀ngburoko 'yì ga bi cì k̀rì a doa eso m̀ndìsìyé cigí Lomo do k̀tì ngére ní, ìnyiyé útúye do ngúrú s̀ndìye bi ótú doyé óto úndru wo bi ni trìdrìné za fí ní. Zíye óto tagíya gi ro doyé bi kó'dù k̀tì ngére do ndìsìyé úku ledre zía kídí,

¹¹ “Áyí Ngére ezé kpá Lomo ezé, utúásá
m̀útúásá
zíze kófó iriyí,
zíze kpá óto úndruyí gi zía roko'buyí ofu go.
Ótoógu éyì e mbá yì,
gi zí m̀iyéme ledre eyí zíye ídíye kenée,
káa zí bi otoogù yée ní.”

5

'Yì e mbofoní Yésu

¹ Née ní zíma lúrúndíki mikúrókù mbílí wáraga do sílì anú 'bi 'yì bi ni m̀ndìsìné do k̀tì ngére ní. Ekéní ledre ro mbílí wáraga máa née gi 'dí kó'dù a kpá gi 'dí sogo a, do kúrúru tara a kí ko'dó e ìnyì doa gbre. ² Zíma lúrúndíki ngíti maláyika bi kí mongú roko'buné ní kí ndìsì ótrú ledre kídí, “Ambí ni útúásá sókooyó ko'dó ga bi ro wáraga ba ne?” ³ Tí lá 'yì bi togú komo ere, togú do sogo kángá ona, togú mbú sí kángá bi ni útúásá líkpí wáraga née zía ólo ledre bi simi a ní ndaá. ⁴ Gi zía bi 'yì bi zía útúásáne líkpí mbílí wáraga née ólo a ndaá ní, zí lerì méngì máa zíma ìni ìni k̀ngaya. ⁵ Zí ngúru mongú 'yì úku ledre zíma kídí, “Ndá ìni ìni wá, lúrú aka wo bi ndìsìní ndólo wo kemì bi gi simi sí do Zúda e bi

bulúndu ngére Dawídi ní ni útúásá líkpí wáraga nées.”

⁶ Nées ní, zíma lúrúndíki Owú Kábiriṣíki káa zí éyí bi oṅgoonzóní go mióngoónzó ní dongará kítì ngére ga gére nées. Zí éyí trìdrì e eso (4) kpá kí mǐngburoko 'yì e ídíye gbaá cigí a. Nì kí ngirì e ìnyì doa gbre (7), kí komo e ìnyì doa gbre (7) niyí 'Dówú Lomo ga bi Lomo ifi bayi yée go do sogo káṅgá mbá ní. ⁷ Zí Owú Kábiriṣíki nées ndéréne 'dí'bi mǐkúrókú wáraga bi sǐlì anú 'bi 'yì bi ndìsì do kítì ngére ní. ⁸ Simì bi 'di'bi wáraga nées ní ní, zí éyí trìdrì ga bi eso (4) nda kpá kí mǐngburoko 'yì ga bi cì kéré a doa eso (24) ní útú ló'bu komoyé bi kó'dú Owú Kábiriṣíki nées. Yée kékíé'do mbá niyí kí kù'dú do sǐlìye kpá kí kó'do bi yemení gí simì dábu ní kí abúrengú simiyé. Nées ini zí Lomo 'bi mbigí 'yì ga bi 'bi Lomo ní.

⁹ Zíye úku mǐkándá ke'bi kídí,

“Útúásá go 'dí'bi wáraga nées,

zíyì líkpí taráa,

Gì zía oṅgoónzóní kóo yì go,

zíyì úgú lúgu 'yìma'dí e zí Lomo kí sámáyì

kací rǐkí sǐ do 'yìma'dí e kí tara eyé e mbá do

ídíye mbigí 'yì ga bi 'bi Lomo ní.

¹⁰ Óto 'yì e go gí ro zíye ídíye 'yì 'dódo ledre 'bi

Lomo zí 'yì e káa zí 'yì 'dáná éyì e ní,

zíye ídíye zí 'yì e do sogo káṅgá káa zí

mǐngburoko ngére e ní.”

¹¹ Mááyì ídí kíe ní, zíma úwú do tú'dú maláyika e, toro'dikíní kítì ngére kí éyí trìdrì e kí mǐngburoko 'yì ga gére nées go gbaá. ¹² Zí maláyika máa ga gére nées ndìsìyè úku ke'bi kídí,

“Owú kábiríki bi kóo ufuní wo ní,
utúásá miútúásá zía ídíne kí cóngóro, kí tú'dú
éyí e, kí komokenzi nda kí roko'bu zíne.
Zí 'yi e ndísiyé óto úndrua kí kófó iriá.”

¹³ Zíma kpá úwú do éyí tridri ga bi komo ere
ní mbá, kí yée ga bi do sogo kángá ní kí yée ga
bi sí kángá ní, kí yée ga bi simi mingburoko iní e
ní, nda kí ngiti géyí éyí tridri e mbá, zíye ndísiyé
úku ke'bi kídí,

“Kófó iri kí mongú úndru,
idí ídí zí Lomo kpá zí Owú kábiríki
za fí.”

¹⁴ Zí éyí tridri ga bi eso née iniyé ngúngu a yiii
kídí, “Idí kenée.” Geré zí mingburoko 'yi ga gére
née útú ándá royé bi ndísiyé óto úndru Lomo kí
Ngére Yésu.

6

Mizefi Ko'dó

¹ Mááyí ídí kíe ní, Owú Kábiríki likpí mizefi
ko'dó bi odó'dutuní tara wáraga née kíe ní. Zí
ngúru éyí tridri gi dongará éyí tridri ga bi eso
(4) ní ndóndóló kí kúrúne 'dága káa zí nzagba
embéne ní kídí, “Ógu mu.” ² Mááyí lúru bi káa
ní, bikenyí usáni ni mítóroné kó'dúma. O'do bi
ekí ndísi doa ní ni kí sama do sílne kpá kí tagíya
doné. Zí usáni née ndísi ngásane kíe zí 'yi e
ówo a mbá gi zía romo komo ezeokóne e go.

³ Simi bi Owú kábiríki likpí gbre ká'dá ní,
zíma úwú kúrú gbre éyí tridri kídí, “Ógu mu.”

⁴ Zí ngiti bikesí birará usáni kpá óguné. 'Yi
bi ndísi ngásá káa ní ni kí mongú maku do

sílíne 'di'biogu 'bi ené mimbé' de késí zía óto 'yi e ndísiyé úfu royé.

⁵ Simi bi Owú kábiriḱi likpí ota (3) ko'dó ní, zíma úwú kúrú ota (3) éyí tridri kídí, “Ógu mu.” Mááyí lúru bi káa ní, bukulu usáni ni mitóroné kó'dúma. 'Yi bi ekí doa ní kí kákpa 'bi únzu éyí do sílíne. ⁶ Zíma úwú kúrú gi dongará éyí tridri ga bi eso (4) née kídí, “Éyí bi niyí únzu a zí 'yi kí owú kákpa née ni ídí kí tú'dú késí. Áyí ótoómo dúyú yáká ga bi kí éyí ga bi simiyé gi ro ndísi lúru yé káa do sù'bú kí yé ga bi gi ro le'yi kóró ní.”

⁷ Simi bi Owú Kábiriḱi likpí eso (4) ká'dá ní, zíma úwú kúrú eso (4) éyí tridri kídí, “Ógu mu.” ⁸ Mááyí lúru bi káa ní, usáni bi kí roné káa zí mbuku ní ni go ógu. 'Yi bi ndísi doa ní iria Owú Umbu. Iri ezegamá a 'bi ené Zíumbu. I'biní roko'bu zíye do kíé'do gi simi eso (4) * 'bi do sogo kángá zíye ndísiyé úfu 'yi e kí mingburoko maku e, kí mongú 'bú, kí ndiyá, zí bangá sinyí e ánu ngiti géyi ye.

⁹ Simi bi likpí inyi (5) ko'dó ní, mááyí lúru bi sí mbayi bi káa ní, zíma lúru ndíki lafúze ga bi ufuní yé gi zía bi nguḱuní ledre 'bi Lomo zíye ndísiyé úku ledre a kíngaya ní. ¹⁰ Zíye úku ledre kí kúrúye 'daga zí Lomo bi roko'buné kíngaya ní kídí, “Ngére ezé Lomo, yi bi kémbi luyú ledre ndaá royí wá ní. 'Yi ga bi 'do'doní zé zíye úfu zé ba, áyí í'bi 'do'dó royé nda kibe'di?” ¹¹ Zí Lomo í'bi bikenyi bongó zí 'yi ga bi ufuní yé ní.

* **6:8** 6:8 Kíé'do gi simi eso: Togú ifiní kóo simi 'yi e eso do sogo kángá née ní niyí úfuónzó ngúru a bi ifiní ní mbá 'dá'ba.

Zía úku ledre zíye kídí, ndìsìsè aka kí 'búó togú ufu asání 'yì amá ga bì nḡunḡuní ledre amá go nìyí lúndu e mbá gí ro zí 'do'dó ma'dáa útúásáne kpìní.

¹² Sìmi bì líkpíní ìnyì doa kéré (6) ká'dá ní, zí kì'dì káḡgá méngì roné, geré zí kadra ìlìne mḡu, zí komo éfé ésìne káa zí sáma ní. ¹³ Zí kele e ndìsì útúóguyé káa zí miáná kágá ndìsìní útúóguyé gí zí mongú sili ní. ¹⁴ Do kírókúóyó ere káa zí kírókúní sáka ní. Zí landa e kí cúkú e lélíye mbá.

¹⁵ Zí mḡngburoko ngére e, kí 'yì 'bì 'be 'bì eyé e, kí mḡngburoko manda 'bì asikíri eyé e, kí 'yì ga bì kí tú'dú éyì e zíye ní, kí 'yì ga bì kí roko'bù ledre e zíye ní, kí owúkúlú e kí gbékpì 'yì e mbá zíye ídíye kí ngìrì royé bisinyíne zíye ndìsìyè kí ló'boyé sìmi gu landa e ngíti géyì sogo landa e.

¹⁶ Zíye ndìsì ngásáye kí úku ledre kídí, “Áko landa ga ba, ìnyìsè girì óḡu útú'dútú zée wá gí zí 'dì, líkpísè rosé mu zíze ólú ló'bozè simisè gí zí simikesì 'bì Lomo e kí Owú kábìrìkì. ¹⁷ Sìndì kadra 'bì simikesì eyé utúasá go zía gí ro úfuónzó zée. Ambí nì yómo zée gí zía née?”

7

Otoní kací sîlî Lomo sìmi komo 'yì e (144,000)

¹ Gí do kací ledre née ní, zíma lúrúndíki maláyika e eso kí toro do sogo káḡgá do bì e mḡngúngúcú a. 'Dì'bingerìní bisinyí síli bì kí roko'buné ayí óḡu ílì do sogo káḡgá, togú do mikavu e kí kágá e ní go ndá. ² Zíma kpá lúrúndíki ngíti maláyika kí óḡu 'dìyì roné gí 'dì

gbére, gi ro óto kací sîlî Lomo simi komo 'yi ga bi 'bi Lomo ní. Zíá úku ledre kí kúrúne 'dága zí maláyika ga bi eso i'bíní roko'bu zíye gi ro sínyiónzó do sogo kángá kí mikavu ní kídí, ³ “Ndásé aka sínyiónzó do sogo kángá kí mikavu e kí kágá e wá, 'búó togú otozé kací sîlî Lomo go simi komo mbigí 'yi ené e za mbá.”
⁴ Zíye úku ledre kídí, otozé kací sîlî Lomo go simi komo 'yi e álifú kîé'do doa cí gbre doa eso (144,000) née sí do Isiréle e.

⁵ Gi tara mbotu 'bi Zúda 'bi ené álifú sokó doa gbre (12,000),

gi tara mbotu 'bi Rúbene 'bi ené, álifú sokó doa gbre (12,000),

gi tara mbotu 'bi Gáda 'bi ené álifú sokó doa gbre (12,000),

⁶ gi tara mbotu 'bi Aséra 'bi ené álifú sokó doa gbre (12,000),

gi tara mbotu 'bi Nafatáli 'bi ené álifú sokó doa gbre (12,000),

gi tara mbotu 'bi Manási 'bi ené álifú sokó doa gbre (12,000),

⁷ gi tara mbotu 'bi Simiyóna 'bi ené álifú sokó doa gbre (12,000),

gi tara mbotu 'bi Lévi 'bi ené álifú sokó doa gbre (12,000),

gi tara mbotu 'bi Isakára 'bi ené álifú sokó doa gbre (12,000),

⁸ gi tara mbotu 'bi Zebұлұna 'bi ené álifú sokó doa gbre (12,000),

gi tara mbotu 'bi Yoséfa 'bi ené álifú sokó doa gbre (12,000),

gi tara mbotu 'bi Benzemúna 'bi ené álfu sokó
do gbre (12,000).

Tú'dú rîkî sî do 'yîma'dí e

⁹ Gi do kací ledre née ní, zíma lúrúndíki
tú'dú tú'dú 'yî e, 'yî bi ni útúásá ólóonzó yée ní
ndaá. Tú'dú sî do 'yîma'dí e do sogo káṅgá, kací
kúfúye kí tara eyé e mîngúngúcuwa niyí kenée
mbá mítóroyé kó'dú Lomo kí Owú kábîrîkî. Esíní
royé mbá bikenyî bongó, kpá kí mbílí mbîró do
sílîye. ¹⁰ Zí 'yî ga gére née úku ke'bi kí kúrúye
'dága kídí,

“Lomo ezé bi ni mindîşîné

do kîṭî ngére ní

ni kí roko'bu zîne

'bi yómo 'yî ené e.

Owú kábîrîkî ni kpá kenée.”

¹¹ Zí maláyika e ga bi toro'dikíní kîṭî Ngére née
gbaá ní, kí ngíti géyî mîngburoko 'yî ga bi ore,
nda kpá kí ngíti géyî mîngburoko éyî trîdrî ga bi
eso (4) ní ñnyiyé mbá útúló'bu komoyé bi ndîşiyé
óto úndru Lomo. ¹² Zíye úku ledre kídí,

“Idí kenée.

Azé ndîşî mbófo yîi kí kófó ñrîyî,

áyí 'yî komokenzî, azé mbófo yîi kí ndîşî óto
úndruyî,

áyí kí roko'bu ledre e za mbá zíyî,

azé ndîşî óto úndruyî kenée za fí. Idí kenée.”

¹³ Zí ngúru mîngburoko 'yî ga gére née ndú'yú
máa kídí, “Ówo 'yî ga bi kí bikenyî bongó royé
née bú? Ogúní gî 'da?”

¹⁴ Zíma úkulúgu ledre zía kídí, “Mongú 'yî,
ówo yée yîi.”

Zíá úku ledre zíma kídí, “Ga gére née 'yì ga bi kóo nduwúní kíngaya ní. Luguní bongó eyé go drá kí sáma Owú Kábìrìkì. ¹⁵ Gí zì kényí née, “utúasání go tóroyé cigí kítì ngére 'bì Lomo ndìsiyé óto úndrua simi 'dìcì ené kí kadra kpá kí ndulù mbá, gí zía owoní bú kídí Lomo ma'dáa ndìsì sáká yée ne gí simi ledre e.

¹⁶ Éyí bi 'bú ní mengì lolù yée wá, kodró mengì yée wá.

Pho'dù kadra ongbó lolù yée wá, gba bisinyí bimìrì ogù lolù royé kpá wá.

¹⁷ Owú kábìrìkì bi toro kó'dù kítì ngére ní ni ndìsì lúru bi kacíye, zía ndìsì ndéré kíye do 'dawú 'bì trìdrì bi za fí ní.

Lomo ni ó'dó iní ini gí komoyé drá.”

8

Ledre gí ro odù ko'dó bi likpíní ní

¹ Simi bi Owú kábìrìkì likpí ìnyì doa gbre ko'dó ní, zì bi ídìne komo ere síí gbóo kí yana sìnḍí kadra.

² Mááyí ídí kíe ní, i'bíní òbìlì go zì maláyika ga bi ìnyì doa gbre ndìsìní tóro kó'dù Lomo ní kacíye mbá.

³ Zí ngítì maláyika bi kí saáni bi gí simi dábu do sílìne kí abùrèngú siminé ní ógù tóroné cigí mbayi 'bì Lomo. Zía óngbó a 'dáná a zì Lomo káa zì bi mbigí 'yì 'bì Lomo ndìsìní iní ini zì Lomo ní do mbayi bi gí simi dábu ní kó'dù kítì ngére née. ⁴ Zì cika abùrèngú née kí ini 'bì 'yì

ga gére née ndéréne gi do sǐlǐ maláyika née zǐ Lomo 'dága. ⁵ Née ní zǐ maláyika née 'dí'bi saáni do únzụ 'dúcu a kí so pho'dụ bǐ gi sǐ mbayi 'bǐ Lomo ní, zǐa léfe a ruu bi do sogo káṅgá. Gi ore geré zǐ pho'dụ née ndícíphútrụ roné kí mongú roko'buné zǐa ndịsị 'bílé'bené zǐ káṅgá kpá ndịsị kǐzíné.

Maláyika ímíní dǐbǐlǐ e

⁶ Nda gi ore, zǐ maláyika ga bǐ gáa ñnyị doa gbre (7) i'bíní dǐbǐlǐ e ñnyị doa gbre do sǐlǐye ní, yéme royé gi ro ímí yéé.

⁷ Zǐ mizefǐ maláyika ímí 'bǐ ené dǐbǐlǐ. Geré zǐ mǐngụrógó ínǐ káa zǐ mongú 'dófǐ ní kí ngíti éyǐ bǐkesị pho'dụ ní kpá kí sáma útúógụyé gi komo ere do káṅgá. Zǐ dogboṛụ do sogo káṅgá kǐé'do gi simi ota* kí kágá e kí súwú e áraye mbá.

⁸ Zǐ gbre maláyika ímí 'bǐ ené, zǐ mongú so pho'dụ káa zǐ landa ní útúógụné bu simi mongú mǐkavu. Zǐ komo dogboṛụ mǐkavu née ésíne káa zǐ sáma ní. ⁹ Zǐ tú'dụ ngíti géyǐ éyǐ trǐdrǐ ga bǐ simi a ní úyuyé mbá, zǐ dogboṛụ kuṛúngba e 'déweyé gi zǐ roko'bụ ínǐ.

¹⁰ Zǐ ota maláyika ímí 'bǐ ené dǐbǐlǐ. Zǐ mongú kele bǐ ndịsị ndící 'bǐ ené káa zǐ mǐúndụ pho'dụ ní útúógụné ɾee buu simi ngbuṛu e kí dokú'dụ ngbuṛu e. ¹¹ Iṛi kele née nǐ Átá. Gi zǐ kǐyǐ née, zǐ dogboṛụ ínǐ e átáye mǐátá, zǐ tú'dụ ngíti géyǐ 'yǐ ga bǐ ewéní ní úyuyé mbá.

* **8:7** 8:7 Kǐé'do gi simi ota 'bǐ do sogo káṅgá: Togú ifíní kóo simi do sogo ota, ñnyí óngbóónzó ngúru a mbá 'dá'ba.

12 Zí eso maláyika ímí 'bì ené dìbìlì. Zí dogboṛu kadra kí dogboṛu éfé kí kele e ídíye nda lùlù'du oṅoní lolu bì mbì wá. Zí bì rìrìfì néesé ídíne gbóo kí yana kadra kpá gbóo kí yana ndulù.

13 Gì do kací ledre néesé, zíma lúrúndíki agi komo kadra 'dága, zía ndìsì gbúrógbóne 'dága kídí, “Nduwú, nduwú, nduwú ro 'yì ga bì do sogo káṅgá ní gì zía maláyika ga bì ota ní niyí go gì ro ímí 'bì eyé dìbìlì cakaba.”

9

Inyi maláyika imí 'bì ené dìbìlì

1 Zí ìnyì (5) maláyika ímí 'bì ené dìbìlì. Kpá lá bì imí ní, geré zíma lúrúndíki kele bì utúogu do sogo káṅgá ní. 'Di'biogu mafutáa 'bì líkpí tara gu bì olù olù* kíngaya ní kpa kíne. 2 Simì bì líkpí tara gu néesé ní, zì bukùlù cika ólúóguné kùu káa zì cika mì'dutù ní, zía 'dùtù komo kadra kí ere yeré. 3 Zí mbíra e ólúóguyé gì simì cika néesé sùu óguyé do káṅgá. Niyí kí roko'bu 'bì é'be 'yì zíye káa zì ágarabu ní. 4 Ukuní zíye kídí ndaní é'be súwú e kí éyì ga bì utuní ní kí kágá e wá. Idíní é'be dùdù 'yì ga bì ngára otoní kací sùlì Lomo simì komoyé wá ní. 5 Ukuní zíye kídí ndaní úfu 'yì ga bì niyí é'be yéesé néesé miúfu wá. Idíní tí lá 'dó'do yéesé mì'dódo kí éyì miówo bì káa zì 'bì ágarabu ní kí éfé e ìnyì. 6 Simì sùndì kadra néesé gì zì éyì miówo, zì tú'dù 'yì e ndìsiyé ṅgúnṅú umbu, é'e umbu ogù ené 'dí'bi yéesé wá, zíye ídíye

* 9:1 9:1 Gu bì olù olù kíngaya ní: Ba bì bì kí'dí bì bandáotoni Satána doa ní.

tí nziyiyé gí ro úyuyé, umbu ngásá nda yí ené gí zíye mĩngásá.

⁷ Mbíra ga gére née, tosoyé káa zí usáni ga bi yemeomoní yée go nziyiyé gí ro okó ní. Niyí mbá kí tagíya ro doyé gí simi dábu. Simi komoyé ni mbá káa zí simi komo 'yĩma'dí ní. ⁸ Zí bi doyé ídĩne mbá káa zí bi do kará e ní. Zí soyé ídĩne mbá kí mĩngburoko ngĩriné káa zí so kemí ní. ⁹ Zí do kó'dúye órũné gbigaga káa zí késí ní. Zí ngbořu fúndúye kí ìnyì 'dága ndĩsì ngúndruné káa zí gbořu tú'dú usáni e kí ndéréye simi okó ní. ¹⁰ Sono mbíra ga gére née ni kí wowóne káa zí ágarabu ní. Niyí ndĩsì é'be 'yì e kí sonoyé née kí éfé ìnyì (5). ¹¹ Maláyika bi ndĩsì lúru bi kací mongú gu ní, ni ne ngére doyé. Iřia simi tara Ébere ni Abadóno, simi Gĩrĩgĩ 'bi ené Apolóno† ledre gí simia kídí, 'do'dó.

¹² Mizefĩ 'do'dó ukú aka née lá ne. Ngíti géyì 'do'dó e gbre niyí kpá ógu.

¹³ Zí ìnyì doa kéré (6) maláyika ímí 'bi ené d̄ib̄il̄i. Zíma úwú kúru 'yì kí ódroné gí s̄i mbayi k'ídí bi ndĩs̄in̄i 'dáná éyì zí Lomo s̄i mbayi 'bi Lomo bi gí simi dábu ní. ¹⁴ Zí 'yì née úku ledre zí ìnyì doa kéré (6) maláyika née kídí, "Líkpi maláyika ga bi eso (4) 'di'bingeřin̄i yée simi ngbuřu Efaráta ní mu." ¹⁵ Née ní do likpi maláyika ga bi eso (4) yemeotoní yée nziyiyé gí ro s̄ind̄i kadr̄a, kí éfé nda kí simibi 'bi ledre née ní ní, ìnyiyé ndéréye úfu tú'dú ngíti géyì 'yĩma'dí e do sogo kángá. ¹⁶ Maláyika ga bi

† **9:11** 9:11 Apolóno: Simi tara Ébere ini ledre simi a kídí s̄inyiõnzó éyì e.

eso (4) née, niyí kí tú'dù asikíri e do usáni e, oloní yée zíma úwú a romoní cì sokó mǐliyono (200,000,000) go.

¹⁷ Zíma lúru usáni e kí 'yì ga bì doyé ní, odóní mbá sókó késì e do kó'dúye ngíti géyì bikesìne, ngíti géyì káa zì cika ní, zì ngíti géyì idí 'bì eyé rerembeyé káa. Usáni ga gére née toso doyé ni káa zì do kemì ní. Zì pho'dù kí cika nda kí barùtu ndìsì olúoguyé gì koyé. ¹⁸ Zì éyì ga bì olúoguní gì ku bangá ga gére née úfu tú'dù tú'dù 'yì e. ¹⁹ Bangá ga gére née, roko'bù 'bì úfu 'yì e ni simi koyé, kpá ro sonoyé. Sonoyé ni kí doné káa zì do kámá ní togú naná 'yì go yá, zì wowó a ídìne kíngaya.

²⁰ 'Yì máa yée ga bì omoní gì simi umbu ga gére née, iliní eyé óyóló'bó mimbé'deyé wá. Ootomoní eyé óto úndru dokéké e, kí lomo ga bì 'yìma'dí yemení yée gì simi mǐrǐrǐrǐ késì e kí dábù togú mbú yée ga bì gì simi tutú kí kágá, bì ngará lurúní bì wá, uwúní ledre wá, gamání kpá wá ní wá. ²¹ Ootomoní eyé ledre 'bì úfu 'yì e, lóndù, 'berì, kpá kí ledre 'bì ugu ní wá.

10

Maláyika kí Owú Wáraga do sǐlìne

¹ Nda née ní, zíma lúru ndíki ngíti maláyika bì kí roko'buné kíngaya ní kí óguné gì komo ere do káṅgá, buṅṅú solù wo go yeré, zì mǐkórù ídìne ro doa gbaá. Zì simi komoa ndìsì rǐrǐne káa zì sùlù kadra ní, zì kágá sǐndì ga ídíye mbá káa zì ngburu ngírì ga bì kí pho'dù royé ní. ² Maláyika

máa née ogu kí owú wáraga do sîlîne kí tarané mîlîkpíne fúó. Zía ógu tóroné oto sîndîne 'bi anú do mikavu, sîndí a 'bi ngelî 'bi ené do káṅgá. ³ Zía gbúrógbóne 'dága káa zí kemî gburogbóne ní. Simî bi gburogbó ní, geré zí nzagba émbéne kí'dí ìnyî doa gbre (7). ⁴ Simî bi nzagba ga bi ìnyî doa gbre (7) née embéní girí ní, geré zíma ìnyimá gî ro éké ledre ga bi ukuní yée née. Zí ngíti 'yî ótrú kása ledre zíma girí kídí, “Ndá aka éké 'dódo ledre ga bi úwú yée née wá, idíní aka ídî miótoécìyé.”

⁵ Zí maláyika bi gáa toro do mikavu kí ngíti sîndîne do iní, ngíti a do káṅgá ní ìnyìné sîkpi sîlîne 'bi anú 'dága. ⁶ Zía lólóbú kí ìrî Lomo bi ni trîdrî za fí, bi otoogu ere kí éyî ga bi siminé ní mbá, kpá kí do sogo káṅgá za kí éyî ga bi siminé ní mbá, mikavu e kí éyî ga bi simiyé ní mbá kídí, “Sîndí kadra ogu go. ⁷ Simî bi sîndí kadra ogu go gî ro zí ìnyî doa gbre (7) maláyika ímí 'bi ené dîbîlî ní, ledre ga bi kóo Lomo yemeomo yée simî roko'bu ené ní geré zíye méngî royé tí káa zí kóo ukui'bí zí ngíti géyî 'yî kasa ené ga bi nébî e ní.”

⁸ Zí kúrú bi gáa miúwú gî komo ere ní kpá ówú ándá roné zíma kídí, “Ndéré mu zíyî 'dí'bi wáraga bi likpíomoní tara go fúó do sîlî maláyika bi tóro kí kémbî sîndîne do iní kpá do káṅgá ní.”

⁹ Zíma ndéréma úku ledre owú wáraga née zí maláyika née gî ro zía í'bí a zíma. Zía úkulúgu ledre zíma kídí, “'Dí'bi mu, ídî esî a koyî zíyî ánu a. Simî bi áyí ndîsî ánu a ní, ni ídî koyî ngbéngbeté káa zí tezi ní, ni ndéréókpó simiyî

nda mindogóne.” ¹⁰ Zíma 'dí'bi owú wáraga gi do sílì maláyika née ési a komá ánu a. Ni komá tí ngbéngbeté káa zí tezi ní, máúlu nda ní, okpó nda simimá mindogóne. ¹¹ Do úku kása ledre zíma kídí, “Ídí kpá fú úku ledre bi ni ógu méngi roné zí rìkì kúfú 'yìma'dí e, kí rìkì sì doyé kí tara eyé e mìnǵngúcua kí ngére eyé e ní za mbá.”

11

Ledre gi ro 'dìcì 'bi ini zí Lomo

¹ Zí Maláyika í'bíógu kágá 'bi ndárába éyí e zíma. Do úku ledre zíma kídí, “Ndéré mu ndárába simi 'dìcì 'bi Lomo, zíyì kpá ndárába mbayi 'bi Lomo, zíyì kpá ólo 'yì ga bi ndìsiní óto úndru Lomo íri ní mbá. ² Tí lá, ndá ndárába ligá 'dìcì máa née wá gi zía i'bíní go zí 'yì ga bi ndaní Yúda e wá ní. Niyí ndìsì 'dítí simi gara bi lúyú ledre ndaá simi a wá ní kí éfé e cì gbre doa gbre (42). ³ Mááyí í'bí roko'bu zí 'yì amá e gbre niyí ési royé mbá nzenze bongó zíye ndìsìyé úku bilámá ledre amá zí 'yì e kí sílì álifu kíé'do míya gbre doa cì ota (1,260).” ⁴ 'Yì ga bi gbre née niyí káa zí kágá bi kí ìrìné olíva ní, kpá káa zí lámaba bi 'dìcì kací Ngére 'bi do sogo káṅgá ní. ⁵ Togú 'yì ili méngi bisinyí ledre kí 'yì amá ga gére née yá, pho'du ni ólúógu gi koyé óngbóonzó 'yì máa née. Née mìsi'di bi 'yì bi ni méngi bisinyí ledre kí 'yì amá ga gére née ní ni úyu doa ní. ⁶ Ya'dá ga gére née niyí kí roko'bu zíye úku ledre zí iní tóroné kí é'dì simi bi niyí ndìsì úku bilámá ledre amá zí 'yì e ní. Niyí kpá kí roko'bu zíye úku ledre

zí iní óyóló'bó roné káa zí sáma ní gí ro zí bisinyí ɾíkí ndiyá e útúye do 'yì e 'diya káa zí bì iliní ní.

⁷ Simi bì mengionzóní moko bì mákása yéé kíe nées go ní, bangá sinyí bì ní ólúógu gí simi mongú gu ní ní útú kí okó doyé do rómo komoyé zía úfu yéé. ⁸ Umbuyé ní ídí sága do mongú misì'di simi Yerusaléma ore. Née sị ledre bì ndoloní gara née gí zía kpá “Sodóma” do ndólo a kpá kídí, “Ízibiti ní.”* Née gara bì kóo phephéonzóní Ngére eyé simi a ní. ⁹ Umbu ga gére née niyí ídí sága kenée kí sịlì ota kí yanané gí ro zí ɾíkí kúfú 'yìma'dí e, kí ɾíkí sị doyé kí tara eyé e mingúngúcuá ndịsị ógụyé lúru cáyi yéé. Née sị ledre bì yaá ndaní óto yéé gu gí zía wá ní. ¹⁰ Zí 'yì 'bì do sogo kángá e ídíye mbá kí rokinyi gí ro umbu ya'dá ga bì gbre née. Do ndịsịyé méngi ayímbi kí í'bì tákpásịlì zí lafúye gí zía ya'dá ga gére née i'bíní kóo 'do'dó go ro 'yì e do sogo kángá kngaya.

¹¹ Nda gí do kací sịlì ota (3) kí yanané, zí Lomo úru yéé. Zí tú'dú 'yì ga bì lurúní ya'dá ga gére née uruní yì eyé gí simi umbu go ní, ídíye kí mongú ngiri royé. ¹² Zíye úwú kúru 'yì gí komo ere kí ndólo yéé kídí, “Ógụsé giri mu yáa.” Zíye ìnyiyé tí do komo ezeokóye ga gére née ndéréye komo ere 'dága kpurú gí simi burungú.

¹³ Simi sịndí kadra née ní, zí kị'di kángá ídine zí tú'dú ngíti géyi kútú e simi gara ore ndúrụyé mbá. Zí 'yì e úyuyé álifú ìnyì doa gbre (7,000),

* **11:8** 11:8 Sodóma kí Ízibiti: Lomo sinyionzó Sodóma gí zí bisinyí míméngi ledre eyé e. Ólo Dosị éyí e 19:1-29. Lomo yomo 'yì ené e Isiréle e gí simi 'do'dó 'bì owúkùlú gí simi Ízibiti. Ólo Ólúógu 12.

zí yée ga bi omoní ní ndịsiyé mbófo Lomo bi ni komo ere ní gị zí ngịrị.

¹⁴ Gbre 'do'dó ụkụ aka née lá ne, otayé (3) ni go kpá ógu cakaba.

Inyi doa gbre maláyika imí dībīlī

¹⁵ Zí ñnyị doa gbre (7) maláyika imí 'bi ené dībīlī. Zíma úwú kúrú tú'dú 'yị e komo ere kí úku ledre kídí,

“Do sogo káṅgá ba ni sị sīlī Ngére Lomo, kpá sị sīlī Kírésito,

Ni goó ne Ngére doa za fí.”

¹⁶ Geré zí mīngburoko 'yị ga bi cīkérī a doa eso (24) ndịsiní gbaá cigí Lomo ní, ñnyiyé útúye do ngúrú sīndīye bi óto úndru Lomo, ¹⁷ kídí,

“Mbófo éyị zíyị Ngére Lomo bi roko'buyị ofu go ní,

Áyí cakaba bo, gị zía áyí kóo kú yị eyị bo,

Áyí 'yị mongú roko'bu

tónó moko eyị 'bi Ngére go.

¹⁸ 'Yị ga bi kóo mīmbé'deyé ni royị bisinyíne ní, sīndī kadra 'bi 'dó'do yée ogu go.

Sīndī kadra ogu 'dēcị ngbanga 'yị ga bi kóo uyuní go ní,

kpá gị ro í'bí tákpásīlī zí 'yị ñnyị kasa eyị ga bi nébị e ní

kpá mbigí 'yị eyị ga bi kóo ndịsiní óto úndru ñnyị ní,

mīngburoko yée kí mīnzéréye,

kpá sīndī kadra 'bi úfu yée ga bi kóo ndịsiní úfu lafúye do sogo káṅgá ní.”

¹⁹ Nda gị ore, do líkpí mbotu 'dịcị 'bi Lomo komo ere. 'Dịcị ñri zíma lúrúndíkí sondúu bi kí

miyéme ledre 'bi Lomo gi ro 'yi e ní siminé. Zí bimióṅgó 'bílé'bené, zí mongú gboṛu éyí ówúne káa zí nzagba embéne ní, zí káṅgá ndìsì kizìné zí 'dófi e ndìsì rẹ̀rẹ̀oguyé gi komo ere bi.

12

Kára 'yi lára

¹ Mongú lára ledre mengi komo ere. Kára esi kadra roné, zía óto sɛ̀ndìne e gá do éfé, tagíya bi oto doné ní, yemení gi simi kele e sokó doa gbre (12). ² Ni kí siminé, owú ni go ówo gi ro árá. Gi zí miówo owú, zía mbúmbúdu 'dága.

³ Zí ngíti milára kámá bikesine 'dódoógu roné komo ere. Doa 'dényé ìnyì doa gbre (7), kí ngiríne e sokó (10), zí tagíya e ídíye ro doa ga bi ìnyì doa gbre (7) née kékié' do mbá. ⁴ Zía síkpi sononé ndìsì kpírákpi tú'dú kele e kíe, zíye ndìsì rẹ̀rẹ̀oguyé gi komo ere do sogo káṅgá. Zí kámá née ndéré tóroné mbí kó'dú kára bi ayí árá née, gi ro togú árá go yá, zíne 'dí'bi owú née úlu a. ⁵ Zí kára née árá owúo'do bi ni ógu ídíne ngére do kufú 'yìma'dí e mbá kí mongú roko'buné káa zí késì ní. Simi bi ará ní, geré do 'dí'bi wo ndéré kíe zí Lomo 'dága óto wo do kiti ngére. ⁶ Zí mbágá owú née ngásá ndìsìné simi súwú gbála do bi bi Lomo yemeomo zía ní gi ro do lúru bi kací a kí sílì álifú kíe' do míya gbre doa cí ota (1,260) doné. ⁷ Zí okó útúne komo ere. Zí Màyikolo ìnyìné kí tú'dú maláyika ené e ícì okó kí lára kámá née kí lafúga ga bi gi do kací a ní. ⁸ Tí lá zí maláyika e rómo komo kámá née, do ógóoyó wo gi komo

gi zí kámá.* ¹⁵ Zí Satána née sí'dí 'dìyì iní kpúya káa zí ngbuṛu ní ma'díi do bi bi kára née ngasá doa ní, gi ro zí iní née ndéré úfu wo 'dá'ba. ¹⁶ Zí káṅgá líkpí roné, zí iní bi Satána sí'dí née kúkúne mbá simi a, zí kára née ómoné. ¹⁷ Zí mimbé'de Satána ési tátá roné ro kára née nda 'dá'dá. Zía nda ídíne go kpá ezeokó ngíti géyì owú ga bi 'bi kára née ní gi zía niyí née go mbá 'yì úwú kúrú Lomo zíye ndìşiyé méngì ledre ga bi Yésu 'dodo zíye ní. ¹⁸ Zí Satána née ndéré tóroné kó'dú ngbuṛu née ndìşì óndó bi.

13

Bangá sinyí e gbre

¹ Zíma lúru lára bangá sinyí káa zí bangá iní ní kí ólúógu gi simi mikavu.

Doa 'dényé ìnyì doa gbre (7) kí ngìrìne sokó (10). Zí tagíya e ídíye do ngìrìga ga bi sokó (10) née mbá. Ekéotoní kese ga bi ndìşì úku Lomo kíe ní ro doa ga bi ìnyì doa gbre (7) née mbá. ² Bangá sinyí née, tífí a ni káa zí tífí kéri ní, sókó şindíga 'bi eyé nda mbá mĩngburokoyé káa zí 'bi ngíti bangá sinyí bi kí ìrìné bíya ní, zí taraa ídíne káa zí tara kemì ní. Zí lára kámá née i'bí roko'bu bi ni kíe káa do ngére ní zía gi ro zía ndìşìné méngì lára ledre e kíe. ³ Ngúru do lára kámá née ni kí mongú mbiṛi roné. Zí tara 'yíma'dí e do sogo káṅgá ìdrìye mbá mĩdrì kí lúru mbiṛi née. Gi zí kényì née zí 'yì e do sogo káṅgá mbá ṅúṅgu ledre bangá sinyí née. ⁴ 'Yíma'dí e ndìşìní óto

* **12:14** 12:14 Kámá: Ndìşìní kpa ndólo a daragóna, ìrìja Satána ngére 'bi bicayi lomo e.

úndru lará kámá née gí zía bi i'bí roko'bu zí bangá sinyí née ní ní. Zíye ndísiyé óto úndru bangá sinyí née kídí, “Ambi ni káa zía ne? Ambi ni útúásá méngi okó kíe ne?”

⁵ Lomo ootomo aka sɪndí kadra ne zí bangá sinyí née ndísi úku née kí bisinyí kese e kpá kí ndísi 'dódo roko'buné kí éfé e cí gbre doa gbre.

⁶ Ni ndísi úku Lomo kí úku sinyi ledre gí do bi ere kí 'yì ga bi komo ere íri ní mbá. ⁷ Ootomoní aka wo zía ndísiné ícì okó ro 'yì ga bi ɲuɲguní ledre Lomo go ní gí ro zía rómo komoyé. Lomo i'bí aka kpá roko'bu go zía gí ro zía aka ídíné káa zí éyì bi ni go ngére do 'yìma'dí e do sogo káɲgá za mbá ní. ⁸ 'Yì ga bi ndísiní óto úndru bangá sinyí née niyí ye yée ga bi ìriyé ndaá miékéne kú gí do síne sími búkú 'bi trídri bi za fí 'bi Owú kábìrìkì bi kóo ufuní wo ní wá.

⁹ 'Yì bi mbílí a uwú ledre bú ní ídí úwú ledre née.

¹⁰ Togú Lomo ɲuɲgu ne kídí idíní 'dí'bi 'yì yá, niyí 'dí'bi wo.

Togú ɲuɲgu kídí idíní ɔɲgoónzó 'yì mióɲgoónzó yá, niyí tí ɔɲgoónzó wo.

Ledre née 'dodo kídí 'yì ga bi ɲuɲguní ledre 'bi Lomo go ní idíní ndísi útụ símiyé zíye ndísi tóroyé ngbúó.

Milára bangá olúogu gí sími káɲgá

¹¹ Zíma kpá lúrúndíki ngíti milára bangá sinyí kí olúóguné gí sími káɲgá. Ni kí ngíríne e gbre káa zí ngírí kábìrìkì ní, zía ndísi ódroné káa zí lará kámá ní. ¹² Bangá máa wo née ndísi méngi

moko kí roko'bu 'bi bangá sinyí máa wo bi kí mongú mbiṛi ro doné ní. Ili ndịsị lónodo 'yi e gi ro zíye ṅgúṅgu mbá ledre 'bi bangá máa wo bi kí mbiṛi ro doné née. ¹³ Bangá máa wo bi olúogụ gi simi gu née, ni kí roko'bu 'bi méngi lárá ledre zíne, oto pho'dụ zía útúóguné gi komo ere zí tú'dú 'yíma'dí e lúru a mbá cù kí komoyé. ¹⁴ Gi zí roko'bu ledre ga bi ndịsị méngi yée do bi kacị mizefi bangá sinyí née ní, zía lónodo tú'dú 'yíma'dí e do sogo kángá. Oto 'yi e zíye yéme lili mizefi bangá sinyí bi kí mongú mbiṛi ro doné ní, zíye ndịsiyé óto úndrua. ¹⁵ I'biní roko'bu zía gi ro zía óto lili mizefi bangá sinyí bi 'yi e yemení ní gi ro zí lili ga máa née ídiye mbá tridri do ndịsiyé ódroyé miódro. Gi ro zíye úku ledre gi ro 'yi ga bi otoní úndru lili máa ga gére née wá ní, idiní úfu yée 'dá'ba.

¹⁶ Zía kpá úku ledre kídí, 'yi e za mbá, yée ga bi kí ledreyé owóowó kí yée ga bi ledreyé owó wá, yée ga bi kí éyí e zíye kí yée ga bi 'yi lerí e ní, gbékpí 'yi e kí owúkúlú e mbá, idiní éké lili mizefi bangá sinyí née ro kágá siliye 'bi anú togú simi komoyé, ¹⁷ gi ro 'yi bi lili née togú mbú éyí miólo do bi kacị lili née ndaá miékéne roa wá ní, ndaá ndéré úgú éyí, togú úgúoyó éyí e wá.

¹⁸ Ekéní lili mizefi bangá sinyí née kí námba. Miólo a ni míya inyi doa keri kí ci ota doa inyi doa keri doné (666). Ídí sómú sí ledre 'bi miólo iri bangá née bilámáne gi ro ziyi ówo ledre gi simi a, gi zía, miólo a née 'dodo iri 'yi.

14*Owú kábiríkí kí 'yì ené e*

¹ Zíma lúrúndíki Owú kábiríkí kí tóro do Landa Záyono kí 'yì ené e míya kíé'do cì gbre doa eso álifu (144,000). 'Yì maáge niyí mbá kí ìrĩa kpá kí ìrì 'Bua miékéne simi komoyé. ² Zíma úwú kúrú 'yì kí ndìsì ngúndruné komo ere káa zì mongú vuru ní, kpá káa zì nzagba ndìsì émbé ne ní. Gboru éyì bì máúwú ní nì káa zì 'yì ímí káṅgá e ndìsíní tólo kófó ke'bì kí káṅgá ní. ³ Zì túb'dú 'yì ga gére nées ndìsìyé úku mikánda ke'bì kófó ìrì Lomo kó'dú kítì ngére kpá kó'dú éyì trìdrì ga bì eso nda kí mǎngburoko 'yì ga bì niyí mǎndìsìyé ore ní. 'Yì bì útúásá ówo ke'bì nées ní ndaá dúú 'yì ga bì míya kíé'do cì gbre doa eso álifu (144,000) omoní go do sogo káṅgá ní. ⁴ Nées 'yì ga bì otononí royé kí sómú ledre eyé e mbá zíye ndìsìyé méngì dúú ledre ga bì Owú kábiríkí ili yéé ní. Gì zía i'bí roné do úyuné gì royé 'dí'bióyó umbu bì kóo ayíní úyu a ye gì zì lúyú ledre eyé ní, niyí nda go zì Lomo kí Owú kábiríkí kí ledreyé owóowó. ⁵ Kémbì ɾanga owúogu gì tarayé wá, niyí yì eyé go mbigí 'yì 'bì Lomo.

Maláyika e ota

⁶ Zíma lúrúndíki ngíti maláyika kí ìnyì kí fúndúne komo ere. Nderé kí ótrú bilámá ledre bì za fí ní zì kífú 'yìma'dí e kací sù doyé kí tara eyé e mǎngúngúcu do sogo káṅgá za mbá. ⁷ Ndìsì ótrú a kídí, “Sées 'yìma'dí e za mbá, ídísé óto úndru Lomo zise ndìsìsé kófó ìrì a, gì zía sǎndì kádra ené 'bì 'dəcì ngbanga ogú go. Ídísé mu

óto úndru Lomo zíse ndísisé kófó ịrị a gị zía bì otoogu ere kí do sogo kàngá kí ngburu e kí dokú'dụ ngburu e mbá ne ní.”

⁸ Zí gbre maláyika óguné gị do kací ezené nées ndísiné úku ledre kídí, “Mongú gara bì Babelóniya* ba ụkú go, ụkú go. Gị zía tú'dụ rịkí sị do 'yị e mbá 'dì'biní nda yị eyé go bisinyí miméngi ledre ga bì simi mongú gara máa nées ní ní.”

⁹ Zí ota maláyika óguné ndísiné úku ledre kídí, “Togú 'yị e ngununí ledre 'bì bangá sinyí nées, zíye ndísiyé óto úndru a, zí ịrịa ídine miékéne simi komoyé togú mbú ro sịllye yá, ¹⁰ Lomo nì 'dó'do yée kí 'do'dó 'bì odu a ndaá ní, zíye ndúwúye kینگaya, zíye ndísiyé náná do soyé gị zí miówo pho'dụ do komo Owú Kábiri kị maláyika e. ¹¹ Cika pho'dụ bì gị doyé ní ụkú wá nì ídì fú lá gúndrụ. 'Yị ga bì ngununí ledre 'bì bangá sinyí nées, zíye ndísiyé óto úndru a, zí ịrịa ídine miékéne simi komoyé togú mbú ro sịllye ní, 'do'dó eyé nì ídì kí ndulụ kị kadra 'dowúní royé wá.”

¹² Káa zí bì goó kenées ní, 'yị ga bì ngununí ledre 'bì Lomo go, niyí go mbigí 'yị ené e ní, kací

* **14:8** 14:8 Babelóniya: Gị do kací sındi kadra 'bì Nówa, zí 'yị e ó'bó mongú 'dịcị mbíwu 'dága simi Babelóniya, tí lá zí Lomo girágá báyi yée gị ro zíye ndísi ódro tú'dụ rịkí tara e. Nda gị do kací tú'dụ simibi e, zí mongú ngére 'bì Babelóniya 'dì'bi Isiréle e káa do owúkúlú e simi Babelóniya. Lurúní nda kóo Babelóniya káa zí mongú gara bì ndísi ịcị okó ro Lomo kí 'yị ené e ní. Ólo ledre gị roa simi Dosị éyí e 10 kí Dániyele 1:1-2.

kadra mbá, idíní ndịsị úwú kúrú Lomo zíye ndịsị tóroyé ngbúó tí káa do 'yì lódú kací Yésu.

¹³ Zíma úwú kúrú gị komo ere kídí, “Ídí éké ledre ba kídí tónóne cakaba ndéréne 'dá'dá 'yì ga bi umbu ni 'dí'bi yée kí lódú kací Yésu oyóní sogoyé zía mbá wá ní, Lomo ni í'bí úndru zíye.”

Zí 'Dówú Lomo úku ledre kídí, “Nì kenée ma'díi, niyí 'dówú royé gị zí kúrú zí bilámá míméngì ledre eyé 'dí'biógù rokinyi zíye.”

Nduwú ro 'yì lúyú ledre e

¹⁴ Nda gị ore, zíma lúrúndíki bikenyí burungú kí 'yì doné “káa zí owú 'bi 'yìma'dí ní.” Nì kenée kí tagíya gị simi dábu doné, kí bikafa maku do sílíne. ¹⁵ Zí ngíti maláyika ólúóguné gị 'Dìcì 'bi Lomo ótrú ledre zía kídí, “Sìndì kadra ogù go gị ro zíyì 'dècì ngbanga 'yì e kí maku eyì née káa zí sìndì kadra ogù ne zí m̀ngì yáká tónóne óngò kére gị yáká ní.” ¹⁶ Tí ma'díi, zía tónóne óngò kére ga bi 'bi do sogo kángá ní mbá 'dá'ba.

¹⁷ Zí ngíti maláyika kpá ólúóguné gị 'Dìcì 'bi Lomo komo ere kpá kí 'bi ené bikafa maku do sílíne. ¹⁸ Nda gị ore, zí maláyika máa wo bi ndịsị lúru bi kací pho'dụ kí'dí bi ndịsini 'dáná mbayi 'bi Lomo ní ólúóguné ótrú ledre zí maláyika bi kí bikafa maku do sílíne ní kídí, “Ndéré mu zíyì líkpí miáná kóró ga bi yáká kóró íri née mbá 'dá'ba gị zía sìndì kadra 'bi líkpí yée ogù go.” ¹⁹ Zí maláyika née tí ìnyì ndéréne do sogo kángá, zía líkpí miáná kóró ga bi yáká kóró íri née mbá do léfe yée simi tóvì do útru yée gị ro

'dódo mimbé'dekesí 'bi Lomo. ²⁰ Zí maláyika née ìnyiyé kí lafúne e ùnzụ miáná kóró ga gére née mbá ólúógu kíye gí simi yana gara 'dí sogo do ndísiyé útru kánya yée. Zí sámáyé ndísi kúkúne bi kpúya káa zí mongú ngburu bi olú miólú ní.

15

Maláyika bi kí odu nduwú ní

¹ Zíma kpá lúru ngíti lára ledre komo ere. Maláyika e ìnyị doa gbre kí ríkí 'do'dó e ìnyị doa gbre kpá gí ro 'dó'do 'yị e kíe. Togú wo née mengíní royé go yá, zí mimbé'de Lomo nda ìdríne.

² Málúru éyí kí rírí káa zí do mikavu kí mindící pho'du ní gí gbála. 'Yị ga bi mítóroyé kó'dú mikavu née íri, niyí 'yị ga bi romoní komo bangá sinyí née kí lịlị nda kí námba bi ndísi 'dódo ìrị bangá sinyí née ní ní. Niyí kenée kí kụ'dú bi Lomo i'bí zíye ní do sílíye. ³ Ndísiní úku ke'bi ga bi kóo Músa 'yị 'bi moko 'bi Lomo ndísi kóo úku yée 'desí, kpá kí kófó ìrị Owú kábiríkí kídí, "Ngére Lomo, áyí 'yị roko'bu, ndísi méngí mbá mìnbguroko ledre e.

Kací kadra mbá, ndísi méngí ledre ga bi utúasání miútúásá ní, gí zía áyí yị eyí 'yị méngí ma'dí, gí zí kényí née, áyí Ngére 'bi kúfú 'yíma'dí e mbá.

⁴ Ngére Lomo, ambi utúasá ndísi óto úndruyí, kí ndísi kófó ìrịyí wá ní ne?

Áyí duú yí 'yị bi lúyú ledre ndaá roa wá ní. Zée 'yíma'dí e do sogo kángá za mbá,

azé ndịsị kófó ịrịyị
gị zía owozé go kídí ndịsị méngị duụ bilámá
ledre e.”

⁵ Gị do kací a née, zíma kpá lúrúndíkí ngíti ledre kpí komo ere. Née kútú bì yemení káa do lịlị 'Dịcị 'bì Lomo ní, likpíní mbotụ a go fúó. ⁶ Zíma lúrúndíkí maláyika e ịnyị doa gbre yemení yée gị ro 'dí'biógụ 'do'dó do 'yịma'dí e do sogo káṅgá kí ólúógụ gị do mbotụ bì likpíní née gírí. Esiní royé mbá bikenyị bongó, zíye ódó royé ká'dá bì yemení gị simi dábu ní. ⁷ Zí ngúru éyị trịdrị ga bì eso ní, 'dí'bi kó'do e ga bì gị simi dábu ịnyị doa gbre (7) mbá kí 'do'dó e simiyé ní í'bí yée zí maláyika ga bì ịnyị doa gbre (7) née. Ga gére née bisinyí ledre ga bì Lomo bì nì trịdrị za fí ili 'dó'do 'yịma'dí e kée ní. ⁸ Zí cika mongú roko'bu 'bì Lomo ídine 'dịcị ịri kụ. 'Yi utúasá ndéré ólúne ịri wá, 'búó togú maláyika ga bì ịnyị doa gbre née mengionzóní moko eyé go.

16

Kó'do 'do'dó e ịnyị doa gbre

¹ Gị do kací ledre née ní, zíma úwú kúrú 'yị kí úku ledre gị 'Dịcị 'bì Lomo gírí zí maláyika ga bì ịnyị doa gbre (7) née kídí, “Ndérésé mu léfe 'do'dó ga gére née do 'yịma'dí e do sogo káṅgá.”

² Zí mizefi maláyika ịnyịné ndéréne léfe 'bì ené 'do'dó do sogo káṅgá. Zí éyị ko'bo e ndịsị óto royé ro 'yị ga bì lịlíní lịlị bangá sinyí royé zíye ndịsị óto úndrua ní.

³ Zí ngíti a ndéréne léfe 'bi ené simi mikavu. Zí komo iní óyóló'bó roné káa zí sáma umbu 'yi ní, zí éyí trìdrì ga bi simi iní máa née úyuyé mbá.

⁴ Zí otayé (3) ndéré léfe 'bi ené simi nḡbuṛu e kí dokú'du nḡbuṛu e mbá. Zí komo iní ga gére née óyóló'bó royé kpá mbá káa zí sáma ní. ⁵ Zí maláyika bi kí roko'bù 'bi do iní ní úku ledre kídí,

“Áyí yí eyí kóo kú bo,
áyí ídí fú lá bo.

Ndá 'bi eyí 'yi lúyú ledre wá.
Utúasá miútúasá zíyi

káa 'do'dó ro 'yi e káa zí née.

⁶ Ufuní kóo tú'dú 'yi eyí ga bi kóo nḡnḡnḡnḡ ledre eyí ní kí nébi eyí e.

Méngì go bilámáne, zíyi óyóló'bó iní káa do sáma zíye ndísiyé éwé a. Née ledre bi iliní ní utúasá go kpìni kíye.”

⁷ Zíma úwú kúrú 'yi gí sí mбайi 'bi Lomo gírì kídí,
“Ma'díi, Ngére Lomo, roko'buyí ofu go,
mi'décì nḡbanga eyí ni miútúasáne.”

⁸ Zí eso (4) maláyika née léfe 'bi ené komo kadra. Zí 'yi e ndísi áraye gí zía káa zí pho'du ní.

⁹ Zí 'yi e ndísi áraye gí zí pho'du kadra bisinyíne, iliní eyé nda oyólo'bó mimbé'deyé zíye nḡnḡnḡ ledre 'bi Lomo wá, iliní eyé zíye mbófo Lomo wá. Ndísiní nda yí eyé úku sínýi ledre kí mimbé'de késí zí Lomo bi ni kí roko'bù 'bi úcuómo 'do'dó née ní ní.

¹⁰ Zí ìnyì maláyika léfe 'bi ené mbá do kítì ngére 'bi bangá sinyí, zí mitulurù útúne simi bi bi ni doa káa do ngére ní mbá. Zí 'yi ené ndísiyé

náná do soyé gi zí éyí miówo. ¹¹ Gi zí bisinyí éyí miówo bi royé gi zí éyí ko'bo ní, zíye ndìsiyé úku bisinyí ledre gi do bi Lomo bi ni Ngére 'bi komo ere ní. Zíye kpá fú ndìsi eyé nda méngi bisinyí ledre e.

¹² Zí ìnyì doa kéré (6) maláyika léfe 'bi ené simi mongú ngbuṛu bi kí ìrìné Efaráta ní, zí mongú ngbuṛu nées ndúkúne gi ro yéme misi'di zí ngére ga bi 'dí gbére ní. ¹³ Zíma lúrúndíki bicayi lomo e ota (3) káa zí mbó'dó e ní. Ngíti a olúogú 'bi ené gi ku mongú kámá, ngíti a olúogú 'bi ené gi ku bangá sinyí, zí ngíti a olúogú 'bi ené gi ku nébì bi 'yì ranga ní. ¹⁴ Bicayi lomo ga bi ota nées niyí kí roko'buyé gi ro méngi ledre ga bi kí roko'buyé ní káe. Ìnyìní ndéré zí ngére 'bi káṅgá e mǐngúngúcuá yéme ledre kéye gi ro asikíri e gi ro zíye ídíye nziyiyé ìçì okó simi bi Lomo bi roko'bua ofu go ili go 'dèçì ngbanga ní.

¹⁵ “Míndá'baógumá, ni líyì 'yì e mbá mǐlíyì. Yé ga bi niyí ndìsi kí komoyé kacíma ní, Lomo ni í'bí úndru zíye. Yé ga bi ndìsiní yì eyé síkala ní, dukuwu ni méngi yé gbála káa zí éyí bi ndìsiní ngírà do nyará bi ní.”

¹⁶ Zíye yóko ngére e mbá do bi bi ndìsiní ndolo a kí tara Ébere e, Aramagédo ní.

¹⁷ Zí ìnyì doa gbre (7) maláyika léfe 'bi ené kuy simi síli 'dága. Zí kúrú 'yì ówúne gi 'dìçì 'bi Lomo girí kídí, “Utúasá go.” ¹⁸ Zí zangba 'bilé'bené, zía ndìsi émbéne, zí bisinyí kì'dì káṅgá ídíne 'dá'dá a ndaá aka kenée kú wá. ¹⁹ Gi zí kì'dì káṅgá nées ní, zí mongú gara bi Babelóniya ní ndúru ífi siminé za 'dényé ota. Zí gara 'bi kúfú

ngíti géyì 'yì e kpá ndúrúné. Ledre lúyú ledre bi 'yì 'bi Babelóniya ligi Lomo wá, 'do'do yée bisinyíne gi zí simikesí. ²⁰ Zí mingburoko cúkú e kpá kí mingburoko landa e lélíye za mbá gi zí mongú roko'bu bi 'bi Lomo ní. ²¹ Zí mingburoko 'dófi e káa zí misisilekpe tutú e owóowó kángaya ní ndìsiyé útúkanya 'yìma'dí e. Zí 'yì ga bi uyuní aka wá ní ndìsiyé úku sínyi ledre zí Lomo gi zí 'do'dó bi i'bíogú doyé ní.

17

Kára kí bangá sinyí

¹ Zí ngúru maláyika ga bi ìnyi doa gbre (7), wo bi lefe bisinyí éyì gi simi kó'do ené ní óguné úku ledre zíma kídí, “Ógú mu zíma 'dódo 'do'dó bi Lomo ili 'dó'do kére kára 'yì gámá kací ya'dá e* bi ndìsi ndìsi do tú'dú iní e ní zíyì. ² Kára née ngére ga bi 'bi do sogo kángá ní ndìsiní go mbá kie káa do kára. Míméngi ledre ené 'yì e ndìsiní nda kóyó gi zía mikóyó.”

³ Simi roko'bu 'bi 'Dówú Lomo, zí maláyika bi gáa née 'dí'bi máa ndéré kíma gbála simi súwú. Zíma lúru kára née ekí ndìsi go gá do bikesí bangá sinyí.† Bangá sinyí máa née ni kí doné 'dényé ìnyi doa gbre (7) kpá kí ngíríne e sokó

* **17:1** 17:1 Kéré kára 'yì gámá kací ya'dá e: Ngiti géyì ndìsiní kpá ndólo wo mongú gara Babelóniya ngiti géyì kí'dí bi niyi go ódro gi ro mongú gara Babelóniya ní, ndìsiní ódro née gi roa.

† **17:3** 17:3 Bikesí bangá sinyí: Bangá sinyí bi kí doné 'dényé ìnyi doa gbre kí ngíríne e sokó ba, ni mizefi bangá sinyí bi olúogú gi simi mikavu ní. Lúru 'Dódoógu 13:1.

(10). Ekéní kese bi ndịsị úku Lomo kée ní go roa yeré. ⁴ Kára nées esị roné bilámá bikesị bongó, do kpá íngí ngíti géyị éyị ga bi yemení gị simi dábu kí tutú ga bi ɾíríní mịrírí ní roné. Zía 'dí'bi kó'do bi yemení gị simi dábu ní do s̄l̄l̄ne. Kó'do máa nées ni 'bé kí bisinyí ledre ga bi 'bi Satána ní, kpá kí 'bi kára máa nées siminé. ⁵ Miéké ledre ni simi komoa kídí,

BABELÓNIYA BỊ MONGỤ GARA NÍ,
NỊ MBÁGÁ ẸKỊ BISINYÍ MIMÉNGỊ
LEDRE E DO SOGO KÁNGÁ.

⁶ Mááyí úku a máyá kára nées ufu tú'dụ 'yị ga bi 'yị lódụ kací Yésu ní go, koyó nda gị zí sámayé go mikóyó.

Simi bi málúrú wo ní, zí bi sínýíne romá gị zía gbála. ⁷ Zí maláyika nées úku ledre zíma kídí, “Bi sínýí royị gị zí ledre 'bi kára nées kenée gị ro 'dí? Mááyí 'dódo bisinyí miméngị ledre 'bi kára nées, kpá kí 'bi bangá sínýí bi kí doné ñnyị doa gbre kí ngiríne sokó bi kára máa nées ndịsị ndịsị doa ní zíyị. ⁸ Bangá sínýí nées ni kóo trịdrị, bi ba ní, ndaá lolu wá. S̄ndị kadra ni go gbóo do úru wo gị simi mongụ gu bi kóo 'dütuní wo simi a ní do nda kpá úfu ándá wo zía úyuné bisinyí umbu. 'Yi ga bi ñnyé ndaá miékéne simi búku 'bi trịdrị bi kóo ni goó miyémeómoné 'desị 'dá'dá do sogo kángá ba ndaá aka wá ní, tarayé ni ñdrị mbá m̄drị kí lúrú bangá sínýí nées trịdrị.

⁹ “Ídí ówo'dí'bi ini ledre gị simi ledre 'bi bangá sínýí nées. Doa ga bi ñnyị doa gbre (7) nées, 'dodo bi ekịekị ga bi ñnyị doa gbre bi kára nées ndịsị

doyé ní. ¹⁰ 'Dodo ledre kpá gi ro ngére e ìnyì doa gbre (7). Yé ga bi ìnyì ní uyuní go mbá. Ìnyì doa kéréye (6) ni aka bo. Ngítíye bi kíé'do ní ogú aka wá. Togú ogú go yá, ni ndìsì lá ca, zía úyuné. ¹¹ Bangá sinyí née ni kóo 'dá'dá ngére, bi ba ní ndaá aka lolu ngére wá. Ni kóo ngúru ngére ga bi ìnyì doa gbre (7) ní. Ni ógú ídine káa zí ìnyì doa ota (8) ngére ní. Zí Lomo nda úfu wo geré 'dá'ba za fí simi bi sìnđi kadra ogú go ní.

¹² “Ngirí ga bi lúru yé sokó (10) née, née mingburoko ngére e sokó tonóní aka moko eyé wá. Niyí karanée tónó moko ndro kí bangá sinyí née, tí lá kacíye akpa káe wá. ¹³ Míméngi ledre eyé ni za mbá kíé'do, zíye ndìsìyé í'bí cóngóro kí roko'bù bi zíye ní zí bangá bisinyí née. ¹⁴ Niyí ìcì okó ro Owú kábìrìkì, zía rómo komoyé gi zía ni Ngére 'bi ngére e za mbá. 'Yì lódú kacíga niyí mìgéléye gi zía bi i'biní royé ndìsì lódú wo ní.”

¹⁵ Maláyika née ya zíma ní, “Mongú iní bi lúru kára née ndìsì ndìsì doa ní, née ríkì sí do 'yíma'dí e kí tara eyé e mingúngúcu. ¹⁶ Bangá sinyí bi kí ngiríne sokó (10) née ni karanée sógó bisinyí kára née. Niyí karanée 'dódo wo zíye í'diógu bongó ené gi roa do ótoómo wo wořóne. Zíye ánu wo, zíye 'dí'bi ngítí a do úcu a bu ku pho'du. ¹⁷ Lomo yeme ledre née kenée ne gi ro zí mingburoko ngére ga gére née óto sómú ledre eyé kíé'do zíye í'bí roko'bù bi zíye ní zí bangá sinyí née gi ro zía ídine ngére 'búó togú ledre bi Lomo uku ní mēngi roné go. ¹⁸ Kára bi lúru wo née, ni go káa zí mongú gara bi ngére ené ni kí roko'buné do lafúne ngére e do sogo kángá mbá

ní.”

18

Miútú gara Babelóniya

¹ Gi do kací ledre née ní, zíma lúrúndíki ngíti maláyika kí ógu gi komo ere. Ni kí mongú roko'buné, zí bi óngóne do sogo káṅgá wé gi zí roko'bua née. ² Zía ótrú ledre 'dága kídí,

“Utú go, mongú gara Babelóniya utú go.

Ni nda go 'be 'bi ɾíkí dokéké e mbá, solú ku'dú e kpá kí ngíti géyí bicayi lomo e niyí ógu óto 'be 'bi eyé nda simi a ye.

³ ɾíkí sí do 'yíma'dí e mbá koyóní go mikóyó, koyóní gi zí bisinyí miméngi ledre 'bi kára née.

Mingburoko ngére ga bi 'bi do sogo káṅgá ní 'di'biní go mbá bisinyí miméngi ledre ené, gi zí bisinyí 'dódo ledre 'bi kára née, zí tú'dú 'yí úgúoyó éyí e ídíye kí tú'dú éyí e záye kíngaya.”

⁴ Zíma kpá úwú ngíti kúrú gi komo ere kídí, “Sée 'yí amá e, ídísé olúógu gi simi Babelóniya 'dá'ba,

káa bi ásé 'dí'bi bisinyí miméngi ledre ené, do 'dó'do kótrú sée ndro kéye ke.

⁵ Bisinyí miméngi ledre 'bi Babelóniya ni go miówoné gi komo ere,

Lomo owoyeme luyú ledre ené e go bilámáne.

⁶ Ídísé méngilúgu zía kpá ledre bi mengi zise ní, zise 'dó'do wo bisinyíne káa zí bi 'do'do sée ní.

Idí ndúwú káa zí bì nduwu sée ní.

7 Ídísé 'dó'do wo zía ndìşiné íni ini gí zí éyí miówo útúásáne kpìni kí mongú rokinyi bì kóo nì simì a ní.

Ndìşì ìlì kíngaya zía ndìşiné úku ledre kídí, 'Mááyí yí amá káa zí me'be mongú ngére ní, mándá 'bì amá 'yì lerì káa zí kára umbu wá, éyí bì mááyí ndìşì ini ini gí roa ní ndaá.'

8 Kadra kíé'do ledre ga ba niyí ógu zía, umbu, ini kí 'bú niyí ógu zía.

Nì áráónzó roné za mbá,

Ngére Lomo, 'yì roko'bu nì 'dècì ngbanga roa ne.

9 "Ngére ga bì 'bì do sogo káṅgá 'di'biní bisinyí méngì ledre 'bì Babelóniya zíye ídíye kí rokinyi gí roa ní, simì bì niyí lúru cika pho'du gí doa gúndru ní geré zíye útúye ndìşì ini wo. 10 Zí mongú ngìrì útúne simiyé, zíye ngásá tóroyé gbála ndìşì ndìşì ótrú kása ini kí ledre kídí,

" 'Bì káa laká nduwú 'di, áko Babelóniya, áyí tí go úkú do komozé ba,

lá simì owú şindì kadra cúku'dée ba ke.'

11 "Zí 'yì úgúóyó éyí e kpá ndìşiyé ini ini gí zía 'yì úgú éyí eyé e niyí go úyuónzó royé. 12 'Yì bì nì úgú éyí eyé ga bì dábu e, miřiriří késì e, tutú ga bì kí lámá royé ní, bongó ga bì kí lámá royé ní, kágá ga bì kí ndonyoyé ní, bilámá éyí ga bì yemení yée gí simì kágá kí so ki'di ní, kpá kí bilámá éyí ga bì yemení yée gí simì késì e kí tutú e ní ndaá. 13 Gba sù'bu mindonyo, kí kágá mindonyo e, kí kágá ukú, le'yì e, sù'bu e, tuđu e, kére e, ítì e, kábìřìkì e, usáni e, arabíya ga bì

bangá ndịsiní lála yée ye ní, owúkúlú e, kpá kí 'yì ga bi niyí bo ní 'yì úgú ndaá.

14 “Zí 'yì úgúoyó éyì e ndịsiyé ini ini kí mbúmbúdí wáwá, wáwá, kí úku ledre kídí, 'Sée 'yì 'bì Babelóniya e, née kenée laká lerí 'di. Mbágá éyì ga bi kóo zise ba ndụkúní gí zise go mbá, nda'baoguní lolu wá.’

15 “Zí 'yì ga bi ndịsiní úgúoyó éyì ga gére née zíye ndịsi ndíki tú'dú késí e ní ídiye kí ngiri royé. Do ngásá tóroyé gbála ini kása ini gí zí ngiri ledre bi ni ndịsi méngi roné ní. 16 Zíye ndịsiyé mbúmbúdí wáwá wáwá kí úku ledre kídí,

“ ‘Bì káa lerí 'di, Babelóniya mongú gara,
tú'dú éyì ga bi kóo zíyì kí ledreyé owóowó
káa zí ledre dábu e, késí e,
kí tutú ga bi ríríní mírírí ní ndaní lolu mbá
wá.

17 Káa zí ledre izi ní, tú'dú éyì ga bi kóo simi Babelóniya ba ndụkúní go mbá.’

“Zí 'yì lála kurúngba e, kpá kí 'yì máa yée ga bi ndịsiní gámá kí kurúngba maáge ní, kpá kí yée ga bi ndịsiní méngi moko simi iní ní, ìnyiyé ngásá tóroyé gbála ndịsi lúrúkása bi íri. 18 Simi bì lurúní cika pho'du gí do Babelóniya gúndru káa zí cika rindí ní, zíye ndịsiyé mbúmbúdí kí úku ledre kídí, 'Ngíti mongú gara bi zía rómoné gí do wo bi ni go áráonzó roné ba ndaá.’ 19 Zíye ndịsiyé ini ini kí mbúmbúdí kí léfe kángá kí mbụkụ simi doyé, kí úku ledre kídí,

“ ‘Bì káa lerí 'di, Babelóniya ukú go.
'Yì ga bi za mbá ndịsiní gámá kací komo
ngburu ní,

nìyí kóo go mbá kí éyí e zíye gí zía.

Káa zí ledre izi ní, éyí ga gére néesé ̀kúní go mbá.

²⁰ Sée 'yí 'bì komo ere e, ídísé ídí kí rokinyi.

'Yí ga bì 'bì Lomo ní, 'yìmikása e kí nẹ̀bì e
mbá, ídísé ídí kí rokinyi,

Gí zía Lomo 'do'do Babelóniya go gí zí bisinyí
ledre ga bì mengì sée kíe ní.' "

²¹ Zí maláyika bì kí mongú roko'buné ní 'dí'bi
mongú tutú káa zí 'bì ̀sụ éyí ní, ̀cụ a bu simi
mongú iní zía úku ledre kídí,

"Kí mimbé'dekesí,

Lomo ní ̀cụóyó mongú gara ga bì Ba-
belóniya ní kenée,

utúasá ndá'baógụ ídine lolụ káa zí wo bì
'dá'dá ní wá.

²² Do 'yí úku ke'bì e kí kụ'dụ, kí kángá,

utúasání lolụ úwú a íri wá.

'Yí 'bì moko 'bì 'yí ̀gúóyó éyí e,

utúasá lolụ ídí íri wá.

Utúasání lolụ úwú gborụ tutú kí ̀sụ éyí ówụ íri
wá.

²³ Bimióngó utúasá lolụ ídí íri wá.

Kúrú o'do kí míkánda me'bené

utúasá lolụ ówụ simi gara néesé íri wá.

'Yí ga bì kóo ndịsiní ̀gúóyó éyí e ore ní nìyí kóo
ye kí roko'bụyé.

Londoní ríki sí do 'yìma'dí e go zíye 'dí'bióyó
komoyé gí ro Lomo.

²⁴ 'Yí ga bì 'bì Babelóniya ní ndịsiní kóo go úfu

nẹ̀bì e kí 'yí ga bì 'bì Lomo ní

kpá kí ngíti géyí do sogo kángá."

19

Mbófo éyí zí Lomo

¹ Gí do kací a née, zíma úwú kúrú tú'dú 'yì e komo ere kí úku ledre kídí,
 "Idízé mbófo Lomo.

Gí zía nì kí roko'bu 'bì yómo 'yì e zíne. Roko'bu gí ro ledre e mbá nì zía.

² Idízé mbófo wo gí zía ndìsì 'dècìyéme ngbanga.

Gí zía nì bilámá ngére, owoofu kací 'dècì ngbanga go.

'Decì ngbanga mongú gara bì ndìsì sínyiónzó 'yì e ní go.

Idízé mbófo wo gí zía 'do'do mongú gara née go gí ro 'yì ené ga bì ufuní yée símì a írì ní."

³ Zíye kpá úku ándá ledre kídí,

"Idízé mbófo Lomo gí zía cika bì gí símì Babelóniyya ní ùkú wá."

⁴ Zí mǎngburoko 'yì ga bì cìkérí a doa eso (24) kpá kí éyí trìdrì ga bì eso (4) ní mbá útúye do ngúrú sǎndìye bì óto úndru Lomo do kítì Ngére ené. Do ìnyiyé mbá ngúnḡu a kídí,

"Idí kenée, Mbófo éyí zí Lomo."

⁵ Zí kúrú 'yì ówúne gí kó'dú kítì ngére gírì kídí,
 "Ídísé í'bì mbófo éyí zí Lomo,

sée 'yì kasa ené e

ga bì ndìsìsé óto úndru a ní,

mǎngburokoyé kí mǎnzéreye mbá."

⁶ Zíma úwú kúrú kí ngúndru káa zí kúrú tú'dú 'yì e ní, kpá káa zí gboḡu mongú vuru ní, nda kpá káa zí nzagba embéne ní kídí,

"Mbófo éyí zí Lomo.

Lomo bi kí mongú roko'buné ní ni goó ne
Ngére ezé.

7 Idízé ídí kí mongú rokinyi,
zíze ndìsìzé ótó úndrua.

Sìndì kadra 'bi ófú ro 'bi Owú Kábirìkì ni go ógu.

Me'bea* yeme roné go nziyiné.

8 I'bínì bilámá mìkànda bìkenyì bongó go
zía ésì a roné.”

Bìkenyì bongó née ini ledre gi simi a kídì bilámá
míméngì ledre 'bi mbigì 'yì ga bi 'bi Lomo ní.

9 Zí maláyika úku ledre zíma kídì, “Ídí éké
ledre ga gére née miéké, ‘Lomo ni í'bí úndru zí
'yì ga bi oguní simi ayímbi 'bi ófú ro 'bi Owú
Kábirìkì ní.’” Zí maláyika née kpá úku ándá
ledre kídì, “Ledre ga bi Lomo uku yée née niyí
mbá ma'díi.”

10 Zíma útúma bi ótó úndrua. Zía úku ledre
zíma kídì, “Ndá ótó úndrumá wá, gi zía mándìsì
méngì 'bi amá kpá moko zí Lomo, káa zíyì kpá
káa zí ngítì géyì lúnduzé e kí lémizé e yée ga bi
ndìsìnì úku ledre Yésu zí 'yì e ní. Ídí ótó úndru
Lomo gi zía 'yì bi ndìsì úku ledre gi ro Yésu zí
'yì e ní, ni kí 'Dówú Lomo siminé.”

'Yì do bìkenyì Usáni

11 Zíma lúru ere likpí roné go fúó, bìkenyì
usáni, ni go tóro kó'dúma kenée. 'Yì bi ndìsì doa
ní ndoloní wo, Bilámá 'yì kpá 'Yì méngì ma'díi.
Nì 'yì 'dècì yéme ngbanga kpá 'yì méngì yéme
okó. 12 Kuṛu'bu komoa ésì 'duo pho'du, zía ésì

* 19:7 19:7 Me'be Kírésìto: Kára bi ona ba toro do bi kací 'yì ga
bi ngunúnì ledre 'bi Yésu go ní.

tagíya e ro doné, zí ìrì ídíne miékeótoné roa. 'Yì ówo'dí'bi ini ledre gí simi ìrì máa nées ndaá, owo yí ené dujú ne. ¹³ Esì roné bongó bî pha'daní simi sáma ní, ìrìja nì, "Kúrú Lomo." ¹⁴ Zí tú'dú asikíri ga bî komo ere ní útúye do kací a, esíní royé kpá mbá bilámá bikenyí bongó, do ékíye kpá mbá do bikenyí usáni. ¹⁵ Odro bî olúogu gí kua ní nì káa zí bikafu maku bî gí ro úfu ríkí sí do 'yìma'dí e kíe ní. "Nì ídí Ngére do ríkí sí do 'yìma'dí e kí mongú roko'buné káa zí késí." Zíá 'dódo simikesí 'bî Ngére Lomo bî royé gí zí bisinyí miméngí ledre eyé ní zíye. Nì ndìsì 'dítí kánya yée káa zí 'yì 'dítí kanya miáná kóró ní. ¹⁶ Bongó bî esì roné ní, miéke ledre nì roa kídí,

"BA NGÉRE 'BÌ ngére e ZA MBÁ."

¹⁷ Zíma lúrú maláyika kí tóroné do kadra, zíá ótrú ledre zí solú ga bî ndìsíní ìnyì simi síli ní kídí, "Ógusé mu simi mongú ayímbi bî Lomo yeme zíse ní. ¹⁸ Ógusé mu ánu umbu ngére e kí umbu manda 'bî asikíri e, umbu 'yì ga bî kí roko'bu zíye ní, umbu usáni e kí 'yì ngásá kíye, umbu 'yì e mbá, yée ga bî kí ro doyé, kí owúkúlú e mingburoko 'yì e kí minzéréye e mbá."

¹⁹ Zíma lúrúndíki bangá sinyí kí ngíti géyì ngére ga bî 'bî do sogo káṅgá ní kí asikíri eyé e, yokoní royé go, nzíyiyé gí ro útú kí okó do 'yì bî do usáni ní kí asikíri ené e. ²⁰ Do 'dí'bingéřì bangá bisinyí kí nébì bî 'yì řanga ní. Née nébì bî ndìsì méngí mingburoko ledre e do bî kací bangá

sinyí née gi ro lón do 'yi ga bi kí lili bangá sinyí née royé ní zíye óto úndru líli a. Uçuní yée go gbrenghára simi mongú pho'du bi ngára ilí kú wá ní. ²¹ Ufuní 'bi eyé ngíti géyi kí mongú maku bi ndisi olúogu gi ku 'yi bi do bikenyi usáni ní. Zí solú e óguyé sụ ndisi ánu umbu e gi bi.

20

Simibi e álifu

¹ Zíma lúrúndiki maláyika kí óguné gi komo ere, ni kí mafutáa 'bi mbotu mongú gu kpá kí mongú ká'dá kési do sílíné. ² Zía 'dí'bingéri mongú kámá bi kpá Satána ní do ódó wo kí ká'dá kési née ngiri zía ndisiné káe roné kí simibi e álifu. ³ Do úçu wo simi mongú gu, do 'dútu mbotu gu née kací a ngbúrú káa bi ni fú ndisi lón do 'yi e ke. 'Búo togú simibi bi álifu (1,000) ní ukú go, do nda líkpí mbotu kací a kí owú sílí cuku'dée.

⁴ Zíma lúrúndiki 'yi ga bi i'biní roko'bu zíye gi ro 'déci ngbanga ní kí ndisi do kiti ngére. Zíma kpá lúru 'yi ga bi koo ufuní yée gi zía bi ndisini koo úku ledre Yésu kpá kí ledre 'bi Lomo ní. 'Yi ga gére née ilini eyé koo ngungu ledre bangá sinyí née wá. Ilini koo kpá gbawá do éké iria ro síliye togú mbú simi komoyé. Zíye ídiye tridri kí Kírésito Yésu do bi kije' do 'deciye nge ngbanga kí tú'du simibi e éyi 'bi álifu kije' do (1,000). ⁵ Ngíti géyi 'yi e niyi aka idi 'bi eyé fú simi bi 'búo togú gi do kací simibi álifu kije' do (1,000) zí Lomo nda úru yée gi simi umbu. Née aka lá mizefi úru 'yi e.

⁶ 'Yì ga bì i'bíní úndru zíye niyí go mbigí ga bì 'bì Lomo ní, niyí yée 'yì ga bì urúní go gí simi mizefì úrú gí simi umbu ní. Gbre umbu ndaá lolu kí roko'bu doyé wá, niyí nda yí eyé go 'yì 'dáná éyì 'bì Lomo kpá 'bì Kírésìto, zíye ídíye kéye ngére e kí simibi e álfu (1,000).

Kírésìto kí 'yì ené e romoní komo Satána

⁷ Gí do kací simibi álfu (1,000), do líkpí Satána gí simi s̀g̀ìni, ⁸ zía tónó gámáne kí lóndo 'yì e do bi eyé e do sogo káṅgá, kí káṅgá ga bì ndoloní Gógo kí Magógo ní mbá gí ro zíye ídíye nzíyiyé gí ro méngì okó. Niyí ídí káa zí sayi ní 'yì óloónzó yée ndaá. ⁹ Zíye ázayé do sogo káṅgá mbá ndéré 'díkí táya 'bì 'yì ga bì 'bì Lomo ní kpíkí, née gara bì kí 'búne do Lomo ní. Tí lá zí pho'du óguné gí komo ere óngbóonzó yée za mbá. ¹⁰ Do úcu ngére 'bì bicayi lomo e bì londo 'yì ga gére née ku mongú pho'du bì ngára ìlì kú wá ní, kí'dí bì uçuní bangá sinyí kí nébì ga bì 'yì ɽanga e íri ní. Zíye ndìsì ndúwúye íri kí ndulù kí kadra e mbá za fí.

Lomo oto Satána kí tú'dú simibi e simi s̀g̀ìni

¹¹ Zíma lúrúndíki bikenyí usáni kí 'yì bì ekí ndìsì doa ní. Zí káṅgá kí ere ngásáoyó royé gí kó'dúa 'dá'ba, bi bì zíye ndéré ndìsìyé doa ní ndaá. ¹² Zíma lúrúndíki 'yì ga bì kóo uyuní go ní mingburokoyé kí minzéréye mitóroyé kó'dú kítì ngére née, líkpíní búku e go fúó, ngíti a 'bì ené búku 'bì trìdri. Do ndìsì 'dècì ngbanga 'yì ga bì uyuní ní kací miméngì ledre eyé e simi bì kóo niyí aka trìdri ní káa zí bì ni miékéne simi búku

ma'dáa ní. ¹³ Umbu ga bi kóo niyí simi iní kí yée ga bi otoní yée mióto ní, zíye ólúóguyé mbá do 'dəcì ngbangayé kací miméngì ledre eyé e simi bi kóo niyí aka trìdrì ní. ¹⁴ Nda gì ore do 'dí'bi umbu kí roko'bu ené bi do 'yì e ní, do úcu yée simi mongú pho'du bi ìlì kú wá ní. Née go gbre umbu. ¹⁵ 'Yì bi ìrìá ndaá miékéne simi búkù 'bi trìdrì wá ní, niyí úcu wo komo mongú pho'du bi ìlì kú wá ní.

21

Mikánda ere kí mikánda do sogo kàngá

¹ Zíma lúrúndíki mikánda ere kí mikánda do sogo kàngá, yée ga bi 'dá'dá ní lelíní go mbá. Míngburoko ngburu e lelíní go mbá. ² Zíma lúrúndíki mbigí gara 'bi Lomo bi Yerusaléma ní kí óguné gì komo ere bi. Ni kí lámá roné kíngaya káa zí mikánda kára bi yeme roné gì zía o'do 'bi ené ni go ógu kí lafa kací a ní. ³ Zíma úwú kúrú 'yì gì do kítì ngére gírì kídí, “Lomo oto 'be 'bi ené go dongará 'yì ené e, niyí go ndìsì kéye gì zía niyí 'yì ené e. Ni ídí Lomo eyé za fí. ⁴ Ni ndìsì ó'dóoyó iní komo gì komoyé. Éyì bi kí ìrìné umbu, ini, éyì miówo ní ndaní lolu wá gì zía miyéme ledre ga bi kóo 'dá'dá ní ndaní lolu wá.”

⁵ Zí 'yì bi ndìsì do kítì ngére ní úku ledre kídí, “Mááyí go méngì éyì e za mbá mikándayé.” Zía úku ledre zíma kídí, “Ídí éké ledre ga bi úwú yée née mbá, gì zía niyí kí ledreyé owóowó kpá ma'díi ledre e.”

⁶ Zía kpá úku ngíti ledre kídí, “Utúasá go kenée, méngìní royé go. Mááyí Álafa kpá

Ómega, dosí éyí e kí odu éyí e. 'Yì bí kí kodró roné ní mááyí í'bí iní miéwé zía, gí simi 'dawú 'bí trıdri bí za fí ní zía éwé a gbékpíe.

⁷ "'Yì ga bí niyí tóro ngbúó ní, mááyí í'bí úndru zıye, zıma ídíma Lomo eyé, zıye ídíye owú 'bí amá e.

⁸ "Tí lá 'yì ga bí toroní ngbúó wá kí yéé ga bí ɲɔɲɔnı́ ledremá wá, 'yì óto úndru lomo ga bí yemení yéé kí sılí 'yì ní, 'yì úfu 'yì e, 'yì 'berı e, 'yì lóndó e, 'yì mála e, 'yì kágá e, kí 'yì ɾanga e, niyí úcu yéé mbá simi mongú pho'du bí ngára ılı kú wá ní. Née go gbre umbu."

⁹ Zı ngúru maláyika ga bí ınyı doa gbre wo bí kí odu kó'do 'do'dó e ınyı doa gbre ní óguné úku ledre zıma kídí, "Ógu mu zıma 'dódo mikánda kára bí iliní ófú a ba zıyı. Née me'be Owú kábirıki." ¹⁰ Zıa 'dí'bí máa simi roko'bu 'bí 'Dówú Lomo ndéré kıma do mongú ngbángbá landa 'dága, zıa 'dódo Mbigı gara bí Yerusaléma ní kí ógu gı zı Lomo gı komo ere bí. ¹¹ Gara máa née ndısi ırı gı zı lámá roko'bu 'bí Lomo bí roa ní miııı káa zı miııı owú tutú bí kí ledrené owóowó ní. ¹² Gara bí o'bó'dikínı gbaá ro mongú gara née miólóne 'dága kí mbotuné sokó doa gbre (12). Zı maláyika e kpá sokó doa gbre (12) ndısiyé do mbotu máa ga gére née kí óndó bí. Do mbotu ga gére née do ekéoto ıri sı do Isiréle ga bí sokó doa gbre (12) ní. ¹³ Mbotu máa ga gére née, ifinı yéé káa, ota (3) 'dí gbére, ota (3) 'dí gólı, ota (3) 'dí do ngelı, ota (3) 'dí do anú. ¹⁴ Otonı dosı gara máa née do tutú e sokó doa gbre (12). Tutú máa ga gére née, niyı mbá kí ıri

'yìmikása ga bi sokó do a gbre 'bi Owú Kábìrìkì ní miékéye royé.

¹⁵ Maláyika bi ndìsì ódro zíma née, ni cú kí ngbángbá bi yemení gí simi dábu ní do sílìne gí ro ndíràbi mongú gara née, kí mbotu a nda kí gara bi o'bó'dikíní kée ní. ¹⁶ Miákpa mongú gara née kí miáya kí mióló gara bi o'bóní roa ní niyí mbá ndro, kilomíta álifu gbre doa míya eso (2,400). ¹⁷ Zía ndíràbi mǎndí gara née kí mióló a, káa zí 'yìma'dí ndírabi éyí née ní zía ndíki a kídí mǎndí a kí mióló a ni mbá mítiri cì ota (60). ¹⁸ Éyí ga bi o'bóní gara née kée ní, rìríní mbá mǎrírí káa zí éyí bi yemení yée mbá gí simi dábu togú késí bi ndìsì rìrì mǎrírí kíngaya ní. ¹⁹ Tutú ga bi o'bóní gara née doyé ní, farání yée mbá kí tosoyé mǎngúngúcu kpa mbá mǎríríyee kíngaya. Mizefiyé ndoloní zásepa, gbreyé ndoloní safíra, otayé (3) ndoloní kalasedóni, esoyé (4) ndoloní emeraláda, ²⁰ ìnyiyé (5) ndoloní saradonìkì, ìnyì doa kéréyee (6) ndoloní karaneliyána, ìnyì doa gbreyé (7) ndoloní kirisolíte, ìnyì doa otayé (8) ndoloní beriyálee, ìnyì doa esoyé (9) ndoloní topáza, sokóyee (10) ndoloní kirisoparéze, sokó doa kéréyee (11) ndoloní zasínita, sokó doa gbreyé (12) ndoloní ametayiséte. ²¹ Mbotu ga bi sokó doa gbre 'bi gara née o'bóní yée mbá kí lísá. Misi'di ga bi simi Yerusaléma ní mbá o'bóní yée kí dábu, zía ndìsì rìríne káa zí do mongú iní gí gbála ní.

²² Málúrúndíki 'Dìcì 'bi Lomo ndaá simi gara ore wá, gí zía Ngéree Lomo bi roko'bua ofu go ní niyí go ye kí Owú kábìrìkì 'Dìcì 'bi Lomo ma'dáa.

²³ Sị ledre bi ili kadra togú éfé gi ro zía ídine simi gara ore ní ndaá gi zía roko'bu Lomo kí Owú kábiríki ndịsiní nda óngó bi ore goó ye. ²⁴ Ríkí sị do 'yìma'dí e nìyí ndịsị gámá kací bimióngó máa née, zí tú'dú m̀ngburoko ngére e ndịsị óguyé kí tú'dú éyí ga bi zíye ní ore. ²⁵ Kací kadra mbá, mbotu gara bi roa née ni fú lá fúó gi zía bi bimíulú bi do 'dùtu mbotu gi zía ní ndaá. ²⁶ Ríkí sị do 'yìma'dí e do sogo kángá mbá nìyí ndịsị ndéré kí tú'dú éyí ga bi zíye ní simi mongú gara née íri. ²⁷ Misi'di ndaá zí bisinyí ledre ólune simi gara née íri wá. 'Yì ga bi ndịsiní méngi bisinyí ledre e kí 'yì ̀rangá e utúasání ólú íri kpá wá. 'Yì ga bi nìyí ólú simi gara née íri ní dùú yée ga bi iriyé ni go miékéne simi búku tridri 'bi Owú kábiríki ní.

22

Ngburu bi iní a ndịsị í'bí tridri zí 'yì e ní

¹ Zí maláyika née 'dódo ngburu bi iní a ndịsị í'bí tridri zí 'yì e ní zíma. Komo iní máa née ni 'duo drá ngbeé ngbeé káa. Ndisị kúkúógú gi sị kítì ngére 'bi Lomo kí Owú kábiríki. ² Iní máa née ndịsị kúkú kpurú gi yana mongú misi'di bi simi gara ore ní. Zí kágá tridri útuyé dogboru ngburu née gi 'dí keřì kpá gi 'dí keřì. Ndisiní áná kí'dí sokó doa gbre simi simibi kije'do kací simibi e mbá. Mbílía ni kágá ndiyá zí 'yìma'dí e do sogo kángá mbá ³ 'Yì ga bi 'bi gara née éyí bi kije'do bi ni sínýí ro Lomo gi zíye gi ro a ní ndaá. Lomo kí Owú kábiríki ndịsiní nda ndịsị

goó ye ore zí 'yì 'bì moko ené e ndìsiyé óto úndru a. ⁴ Nìyì ndìsì lúru Lomo za cù kí komoyé, zí iriá ídíne miékéne simi komoyé mikékeriá mbá. ⁵ Mìtùluru ndaá lolu simi gara née iri wá. Gí zí kényi née, éyì bì zíye ídíye kí somú ledre gí ro ngíti bimióngó kpí gí roa ní ndaá. Ngére Lomo ndìsì nda óngó bì zíye goó ne. Zíye nda ídíye káa zí ngére e ní za fí.

⁶ Zí maláyika née úku ledre zíma kídí, “Ba zaá ma'díi ledre e, Ngére Lomo ndìsì kóo úkuí'bì ledre zí nébì e, úkutátá a, bì nda ba ní, kasa nda go maláyika ené ógu úku ledre ga bì niyì méngì royé 'diya ní.”

Yésu ni ndá'baógu cakaba

⁷ Zí Yésu Úku ledre kídí, “Lúrúsé aka, mááyí go ógu cakaba. Lomo ni í'bì úndru zí 'yì ga bì niyì 'dí'bì ledre bì simi búku ba kí 'búne ní.”

⁸ Maa, Yiwáni, máúwú ledre ga gére née, zíma lúru yé za cù kí komomá. Simi bì máúwú, zíma lúru yé kpá za cù kí komomá ní, zíma útúma bì óto úndru maláyika bì 'dodo ledre ga gére née zíma ní. ⁹ Zía úku ledre zíma kídí, “Ndá óto úndrumá wá. Mándìsì méngì 'bì amá kpá moko káa zíyì, kpá káa zí bì ngíti géyì lúnduyì ga bì nébì e kpá kí ngíti géyì 'yì ga bì 'dí'biní ledre bì simi búku ba kí 'búne ní. Ídí óto duú úndru Lomo.”

¹⁰ Zí maláyika née kpá úku ledre kídí, “Ledre ga bì éké yé née, ídí ólo yé zí 'yì e gí zía sındí kadra bì zíye méngì royé simi a ní ni go gbóo.

¹¹ 'Yì méngì bisinyí ledre e idí fú ndìsì méngì bisinyí ledre e, 'yì lará ídí fú ídí 'yì lará, 'yì

méngi bilámá ledre e idí fú ndiṣi méngi bilámá ledre e, mbigí 'yi 'bi Lomo idí fú idí 'yi 'bi Lomo.”

¹² Zí Yésu kpá úku ngíti ledre kídí, “Mááyí go ógu cakaba. Tákpásílí ni bo mááyí í'bí a zí 'yi kací miméngi ledre ené.” ¹³ Mááyí Álafa kpá Ómega, Mizefí 'yi, kpá Odu 'yi, Dosí éyí kpá Odu éyí.

¹⁴ 'Yi ga bi niyí lúgu bongó eyé* drá ní, Lomo ni í'bí úndru zíye. Niyí ndiṣi ánu miáná kágá 'bi tridri, zíye ndiṣi ólúye simi mongú gara kpurú gi tara mbotu gara. ¹⁵ 'Yi méngi bisinyí ledre e, 'yi lará e, 'yi ga bi ndiṣini só'do royé kí 'yi bi ofúní royé kéye wá ní, 'yi mála e, 'yi úfu 'yi e, 'yi óto úndru lomo ga bi yemení yée kí sílì 'yi ní, 'yi ranga e kpá kí ngíti géyi 'yi méngi bisinyí ledre e, niyí idí 'bi eyé sága.

¹⁶ Zía kpá úku ngíti ledre kídí, “Máa Yésu, mákása maláyika amá go gi ro zía ndéréne 'dódo ledre ga gére née zí 'yi amá e za mbá. Máa bulúndu ngére Dawídi, bi kpá kérikobí ní.”

¹⁷ Zí 'Dówú Lomo kí mikánda kára úku ledre kídí, “Ógu mu.” 'Yi máa wo bi uwú ledre ba go ní idí úku ledre kídí, “Ógu mu.” Yi bi kí kodró royí ní ógu mu, 'yi bi ili go ní ogu mu ewé iní 'bi tridri bi za fí ní gbékpíne.

Odu ledre gi zí Yiwáni

* **22:14** 22:14 Luguní bongó eyé e: Utúasání ólú dujé ye simi mongú gara gi zía luguní bongó eyé go kí sáma Yésu bi ootomo luyú ledre eyé e ní. Sámaa óto bongó eyé zía idíne drá bikenýíne. Lúru 'Dódoógu 7:14.

18 'Yì bì uwú ledre bì miékéne simi búkù ba go, zía 'dí'bi gbékpí ledre ési a simi a ní, Lomo ni í'bí yata 'dó'do bì ekéní ledre a simi búkù ba zía. 19 Kpá kenée, 'yì bì uwú ledre bì miékéne simi búkù ba go, zía 'dí'bióyó ngíti a gi simi a ní, Lomo ni 'dí'bióyó tákpásílí bì trìdrì bì za fí ukuní ledre a simi búkù ba gi zía 'dá'ba. Do 'dí'bióyó wo gi simi mongú gara bì ukuní ledre a simi búkù ba kpá 'dá'ba.

20 Zí wo bì ndìsì úku ledre née úku ledre kídí, “Mááyí go ógu cakaba.” Maa, Yiwáni, zíma úku ledre máyá, “Ídí kenée, Ngére Yésu ógu mu.”

21 Ngére Yésu idí méngì bilámá ledre zíse gi do bì zíse ndìsìsé bilámáse. Idí kenée.

MIKÁNDA LORU 'BI LOMO KÍ DOSÍ ÉYÍ E
Baka: MIKÁNDA LORU 'BI LOMO KÍ DOSÍ ÉYÍ E New
Testament+

copyright © 2016 Wycliffe Bible Translators, Inc.

Language: Baka

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

9ebc1b62-650d-5302-9391-27a31d140102